

PABOJA ETEHUE'YO SHOMAJO BA'E CUANA HUASIJJE ROMANOS

*Pabohua esohui tehue canaje Jesosaja epeeji
cuana Shoma cuiñajji ba'e yasijje*

¹ Eya Pabo bajjani. Jesosaja epeeji cuana, eyaya jiquio esohui tehueaña miquiiana huasijje Shoma cuiñajji ba'eca huasijje. Eya ca ca iña Jesosa Quitoja huoojea'yo ojaya esohui huohuijji. Eyacuiñajjiya eya babaca canaje ojaya esohui huohuijji epojji. Ohuaya eya huoojea canaje quea huiso meshi yasijje ojaya esohui quea pame nee Jesosajo huohuiya.

² Yahuaje nei nei Eyacuiñajjiya ma esohui quea pame Jesosajo ojaya etehue'yojo tehue mee ca poa ojjaña ja ebajji. Ojaya esohui huohuijji yahuaje nei ba'e ma esohui huohui neinei mee ca poa pea'ai. ³ Jamaya Eyacuiñajjiya eseya ba mee cani oja Bacua Ejja oe nei Jesosa ese jayojjaya yamijji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiiquiiana, huapa pojjeama yahuaje ba'ya poa. ⁴ Oya Jesosa Quito ese jayojjaya yamijji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjiya quea ca'a nee neeya oya emano'yojaa shequi mee ca o'oyanaje. Jamaya ohuaya ojjaña ba mee canaje Jesosa e'e jojo nei oja Bacua Ejja, esejaya Emeshi Mese nei.

⁵ Eya Jesusaja epeeji poanijo Eyacuiñajjiya eya ojjaña meshi yasijje huoojea canaje jama ba'a: — ¡Poquicue miya ojjaña Jodio pojjeama cuana huasijje! ¡Ecuea esohui ba meequicue Jesusajo! ¡Onijje jjapeequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjiya eya huoojea canaje quea pame nee.

⁶ E'e ecuea epeeji cuana Shomajo ba'e, Eyacuiñajjiya miquianaya babaca canaje pea cuana nijje Jesosa Quitoja epeeji epojji.

⁷ Jamajjeya eyaya miquiana que jiquio esohui tehueña. Miquianaya Eyacuiñajjiya quea jea nee nee. Ohuaya miquianaya babaca canaje ojaya epeeji nei epojji. ¡Eyacuiñajjiya esejaya Chii aiya, Jesosa Quitohua esejaya Emeshi Mese neiya miquianaya cajaanuana cahua; quea bei nee caba'e meesahua cahua pea'ai!

Pabo ojaya epeeji cuana Shomajo ba'ejo Eyacuiñajji nijje mimiani

⁸ Ecuea epeeji cuana Shomajo ba'e, ojjaña meshijo ba'e cuana miquianajo mimiani quea bei Jesusaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Eyacuiñajji, miya quea pame nee. Ojjañaja eba miyaya miquea epeeji cuana Shomajo ba'e jaahuanaña —eya poani.

⁹ Eyaya e'e jojo nei Eyacuiñajjiya esohui quea pame nee oja Bacua Jesusajo huohui tiitiaña quea bihui nee. Ojaya eba eya onijje mimi majamajani miquianajo. ¹⁰ Eya jama poani ba'a: —Eyacuiñajji, yahuajo eya poqui sa poanaje Shoma huasijje Jesusaja epeeji cuana baa. Jamatii poqui mee jjima

eya miquea. Eyacuiñajji, ¿a'a jjeya eya Shoma huasijje huoojea sa aña miyaya? —eya jamaya Eyacuiñajji nijje mimi majamajani.

¹¹ E'e, eya miqiana ba neinei sa poani Jesusaja epeeji quea ca'a nee epo meesahua'yojji. Edo-jjoshahua Pameya eya ba mee canaje Eyacuiñajji esohui eyacua quea pame. Ma esohui eyacua shajja'ajja majje miqianaya Jesusaja epeeji quea ca'a nee poaje. ¹² Miquianaaya eya baje Jesusaja epeeji quea ja'a nee poani. Cuanaya miqianaya Shomajo ba'e Jesusaja epeeji quea ja'a nee baje eyaya. Jamajjeya Eyacuiñajjiya eseya ojaya epeeji cuana quea ja'a nee po meesahua caje'yo.

¹³ Ecuea epeeji cuana, ¡bacue jiquio esohui! Yahuajo eya poqui sa neinei poanaje miqiana baa. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e jjapeequi meesahuanaje Jesosa nijje. Jamaya eyaya miqianaya Jesosa nijje jjapeequi meesahua sa aña pea'ai. ¹⁴ Eyacuiñajjiya eya huoojea canaje ojaya esohui huohuiya ojjaña cuana huasijje jama ba'a: Ojjaña joya esejaya esohuijo mimiani yasijje, ojjaña pea esohuijo mimiani yasijje pea'ai, ojjaña joya papeni ba po jjima huasijje, joya papeni ba epo cuana huasijje pea'ai, ojjaña huasijje. ¹⁵ Jamajjeya eyaya miqiana Shomajo ba'e yasijje Eyacuiñajjiya esohui huohui sa aña.

Jesosa nijje jjapee neineiQuianijo mimishi cuijea ca'yani Eyacuiñajjiya

¹⁶ ¡Bacue! E'e jojo nei ojjaña joya Jesosa nijje jjapee neineiQuiani Eyacuiñajjiya mimishi cuana cuijea neinei caje'yo, joya ojaya esohui shajja'ajja

majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui jamajaña ojjaña cuana huasijje. E'e, Jodio cuaa ma esohui shajja'ajja majje, Jodio pojjeama cuaa shajja'ajja canaje pea'ai. ¹⁷ Eyacuiñajjija esohui quea pame Jesusajo shajja'ajja majje eseyaya Eyacuiñajjija ejjashahuabaquijji baña jama ba'a: — Ojjaña Jesusaja epeeji nei nei eyaya mimishi cuana cuijeaje'yo e'e jojo nei epojji. Jesusaja epeeji pojjeamaja mimishi ecuijea'yojji pojjeama — Eyacuiñajji poani.

Ojjaña Jodio cuana, Jodio pojjeama pea'ai quea mimishi poani

¹⁸ ¡Bacue ecuea esohui ojjañaja mimishi cuanajo! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajjija esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjejojo. ¹⁹ E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjaña caba cahua, de! ²⁰ E'e, oya ca ca oe Eyacuiñajji nei quea ca'a nee nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje ¡oya e'e jojo nei Eyacuiñajji bacue, ojjaña! Jamatii beca cuana siajje poani jama ba'a: — Eseyaya Eyacuiñajji ebajji pojjeama, jjabameequi ajja, de. ¿Yajja bame yajji eyami ebajjiyojo? — poani. ¡A'a jama siajje pomeya pojji!

²¹ E'e de, yahuajo nei ojjañaja eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima—. Jamaya Eyacuiñajji, miya quea pame nee nee —ajjima. Oya cuana jamaya jjashahuabaqui jjima, de.

Jamajjeya oya cuana quea quehua jjashahuabaquiani, quea mimishi. Jiquio ecua mecajje quea misi poquiani jayojja jama oya cuana quea mimishi ba'yani, Eyacuiñajji ba pojjiima'. ²² Ojjaña ba epo poso jjabaquiani. Chojja, ba jjima nei nei quianaja. Quea mimishi nee nee jjashahuabaquiani, ojjaña de. ²³ Onaaya aje oe Eyacuiñajji nisho bihuia cani; dejja nisho, cuichojji nisho, aquiana nisho, peyo nisho pea'ai ne cani ebihuiajji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

²⁴ Jamajjeya oya cuana quea mimishi ca'a nee nee; jjashajja'ajjaqui ajja jojoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ej-jashahuabaquijji tai jayojja jama ca'atiitii cahua cuaa. Pea cuana nijje aje oe quea mimishi nee capoahua. ²⁵ ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjaña oya cabihuia tiitii cahua! Jamatii joya quea mimishi neeya Eyacuiñajji bihuia pajea cani eyacuiñajji nisho bihuiajji. E'e, oya cuana quea jjashahuabaqui quehua poani, de. ²⁶ Jamajjeya

Eyacuiñajjiya oya cuana cajaa acani jama ba'a: — Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama — Eyacuiñajji poani.

E'e, quea mimishi nee nee ba'yani bicho'ama. Eyacuiñajjiya esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiani. Pea cojjoji pea'ai poani. ²⁷ Dejjja cuana pea'ai aje jjaja oe jamaya quea mimishi epona jayojjaya po pea'ai yani. Ehuanase jea majje epona nijje pojjeama jaani, pea dejjja nijje quea mimishi ba'yani. Onijje dejjja nijje jjaseehuejja cojjoquiani. Jamajjeya jjashajja'ajjaqui ajja jojoya Eyacuiñajjiya oya cuana cajaa acani. Ca'a'ama poani, quea jjashahuabaqui tai poani pea'ai.

²⁸ Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apiojji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama acani ba'a: —Oya cuana ca ca oe quea jjashahuabaqui tai po tiitiiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

²⁹ Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejjja tai, quea nishehui, onaja aqui ana jea ba cani, pea cuana boti'ama nei nei poani, ona mimishi po meeji pea'ai poani. ³⁰ Pea quecuajji poani, jjamimicuijja nobiajjaquijji poani, jjadasiaquijji poani, ojaya epeeji iñameejji poani equecua

mee'yojji, mimijajijji poani, pea cuanajo maimaijji, Eyacuiñajji cajaa acani, pea cuana jeabichajeajji poani, pea nijje mimi ajja pea'ai. Oya mimi-ani ojaya ejjashahuabaquijijjo pea cuana quea bihui po meeji nisho, jjashahuaba tiitiquiani mimishi ya'yojjijo. Oja chii, oja nae shajja'ajja sa po ajja pea'ai. ³¹ Jjashahuabaqui ajja, mimishi cuana quea pame poso acani, ojaya ehuhui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. ³² Dejja quea mimishija eba Eyacuiñajjija esohui etehue'yo e'e nei jama poani ba'a: “Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii” Eyacuiñajji poani.

Maya ojjaña mimishi cuanaja eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

2

Eyacuiñajjiya ca ca oeyaya huohui caje joya mimishi'amajo, joya quea mimishijo pea'ai

¹ Ecuea epeeji cuana, ¿a'a miqianaya jjashahuabaquiani miya ca ca oe quea pame, ma dejja mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi aña pea'ai. Jamajjeya Eyacuiñajjiya miquianaya quea nee nee po mee caje'yo ona jayojjaya. ² Ecuanaaja eba Eyacuiñajjiya ejjashahuabaquijji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. ³ Miya quea mimishi poanijo ¡a'a jjashahuabaquijji jama ba'a: —Eyacuiñajjiya pea cuana quea nee nee po mee caje'yo shajjama' poani jojaya. Eya ca iña cho, quea nee epo meeji pojjeama —a'a jamaya pojji!

¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de, ej-janequiquehuaquijji pojjeama miya. ⁴ E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequene cuaji ajja. Joya ojaya esohui jama ba'e ajja jamatii quea nee nee epo meeji pojjeama. Jamajjeya eya quea mimishi po tiitii-ajo, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. ⁵ Jamajjeya miya quea mimishi nee nee jjejojo, shajjama' poani tiitiijo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. ⁶ E'e jojo nei Eyacuiñajjiya ojjaña eseya sosequia caje'yo ma eseya aninaje sosejje. Ojaya epeeji quea pame quea bihui nee

po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. ⁷ Jamajjeya beca cuana Eyacuiñajjija esohui jama quea pame nee poani Jesosaja ejjashahuabaquijji jayojja epojji, o jayojja jama epojji, onijje eba'e tiitii'yojji. Eyacuiñajji quea bihui nee po mee sa acani. Jamajjeya Eyacuiñajjiya oya cuana bihuia caje jama ba'a: —E'e, miqúanaya ecuea epeeji quea pame nee. Jamajjeya miqúanaya enijje ba'e tiitiije'yo eyajo.

⁸ Pea cuana ca ca Eyacuiñajjija esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. ⁹ E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. ¹⁰ Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiicue eyajo! ¡Enijje ojjaña huoojeajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. ¹¹ Ojjañajo Eyacuiñajji e'e jojo nei jjashahuabaquiani. Esejaya eba'ejjijo jjashahuabaquiani esosequia'yojji.

Eyacuiñajjija ehuohui shajjama' cuanajo e'e nei

¹² Jodio pojjeama cuanaja ba jjima poa Eyacuiñajjija esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuaa ca ca Moisesija etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesija etehue'yo bajji poani, jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

¹³ Moisesija etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecuijea'yojji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. ¹⁴ Jodio pojjeama cuanaja ba jjima Eyacuiñajjiya esohui Moisesija etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya eba eba'ejji quea tai pea'ai. E'e, Moisesija etehue'yo Jodio pojjeama cuanaja ba jjima nei. ¹⁵ Jamatii, Eyacuiñajjiya oya cuana ba meesahua cani ojaya ejjashahuabaqui'yojji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

¹⁶ E'e, Eyacuiñajjiya eba ojjañaja ejjashahuabaqui'ji cuana. Jamajjeya quiije ohuaya e'e jojo nei huohui caje'yo ojjañaja eba'ejji. Ohuaya Jesosa huoojea caje jama ba'a: —Jesosa, joya cuana sosequiacue ma ohua meshijo ba'yahuaa acanaje sosejje! —Eyacuiñajjiya acaje'yo.

Jamaya eyaya, Pabohua huohuiaña ojjaña esohui quea pame nee Jesusajo.

Jodio cuana Moisesija etehue'yo ba majje jamatii shajjama' poani

¹⁷ Jodio cuana, miquianaya mimi huicha'a huicha'ani jama ba'a: —Ecuana ca ca oe Jodio cuana, Eyacuiñajjija babaca ojaya nei epojji. Ohuaya ecuana ojaya esohui ba mee ca poa Moisesija etehue'yo. Jamajjeya ohuaya ecuana ba cani mimishi'ama —miquianaya poani—. ¹⁸ E'e, ecuaaya baña Eyacuiñajjija esohui Moisesija etehue'yo. Jamajjeya ecuanajaya eba Eyacuiñajjija ejjashahuabaqui'yojji. Jamajjeya ecuana ba'yani quea pame nee, mimishi'ama —miquianaya poani.

¹⁹ Jamajjeya miquianaya jama poani pea'ai ba'a: —Jodio pojjeama cuana, Eyacuiñajjija esohui ecuanajaya eba nei nei Jodioja jjejojo. ¡Ecuana jayojjaya oe pocue! —miquianaaya aña—. Ecuaaya Eyacuiñajjija esohui baña Jodiohua jjejojo. Jamajjeya ecuanaya cuaquijiji jayojja jama poani. Jiquio ecua mecajje quea misijo cuaquijijiya ejiojji ba mee cani jayojja jama ecuaaya joya Eyacuiñajji ba pojxima' cuana quea ja'a nee ba'e meesahuaña. ²⁰ E'e, joya Eyacuiñajji ba pojxima' cuana, Eyacuiñajji oe pojji ba epo pea'ai ecuaaya esohui ba meesahuaña. Eyacuiñajjiya ecuana ojaya esohui etehue'yo ba mee ca poa. Ma esohui e'e jojo nei —jamaya miquianaaya aña.

²¹ Miquianaaya pea cuana esohui huohui huicha'a huicha'aña. Jamatii miquea ehuhui

jayojja jama ba'e ajja miquianaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani?

²² —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjojji poani so'o?

—¡A'a eyacuiñajji nisho bihuiajji oe! — huohuime aña.

¿Apiojji acuae jja nequiaa oe Eyacuiñajji bihuia nishoaña quea aquiana jeaa jjejojo?

²³ Miquianaya mimi huicha'a huicha'ani Moisesija etehue'yojo: —Ecuana ca jja ca oe Eyacuiñajjiya ojaya esohui etehue'yo ba mee ca poa —ca jja nequiana ca oe poani.

Jamajjeya apiojji shai miquianaya onijje jjapee nishoquiani, ojaya esohui jayojja jama ba'e tiitii ajja. ²⁴ E'e, yahuaajo nei Eyacuiñajjija etehue'yo jama poa ba'a:

“Jodio cuana, miquianaya ca jja ca oe shajjama' ba'yani. Mi ba majje Jodio pojjeama cuaa Eyacuiñajji cajaa acani”.

Jamaya Eyacuiñajjija esohui yahuaajo nei etehue'yo poa.

Cuiishasha biso nei jehuissejjajea majje pojjeama eseya Eyacuiñajjija epeejji nei poani

²⁵ Jodio cuana, yahuaajo nei esejaya etiiquianaa Moisesiya Eyacuiñajjija esohui tehue ca poa jama ba'a: —¡Mique bacuaja cuiishasha biso nei jehuissejjajecue!

Jamaya eseyaya aña, Eyacuiñajjija esohui yahuaajo nei jayojjaya aña. Jamajjeya Eyacuiñajjija etehue'yo jayojja jama quea pame nee ba'yanijo

cuiishasha ejehusejjajea'yo quea pame. Jamaya ojjaña ba meeaña eseya, Jodio cuana Eyacuiñajjija babaca'yo o peeji epojji. Jamatii Eyacuiñajjija esohui etehue'yo jayojja jama ba'e ajja ca ca ¿apiojji acuae cuiishasha biso nei jehusejjajeaña so'o? Jamatii Eyacuiñajjiya miquianaya ba cani Jodio pojjeama jayojjaya quea mimishi pea'aiya. ²⁶ Jodio pojjeamaa ca ca cuiishasha jehusejjajea ajja. Jamaya po ajja oya cuana. Jamatii beca cuana Eyacuiñajjija esohui etehue'yo quea ja'a nee jayojja jama ba'yani. Jamajjeya Eyacuiñajjiya oya cuana ba cani Jodio jayojjaya, ojaya ebabaca'yo, jamatii cuiishasha jehusejjajea jjima. ²⁷ Jodio cuana, miquianajaya eba Eyacuiñajjija esohui. Cuiishasha jehusejjajeaña pea'ai. Jamatii aje oe Eyacuiñajjija esohui etehue'yo jayojja jama ba'e ajja. Jamajjeya Eyacuiñajjiya miquianaya ba cani shajjama'. Jodio pojjeamaa ca ca cuiishasha jehusejjajea ajja. Jamatii Eyacuiñajjija esohui jayojja jama ba'yanijo, ohuaya oya cuana ba cani mimishi'ama, quea pame. ²⁸ E'e, eseya Eyacuiñajjija esohui jayojja jama ba'yanijo ojaya epeeji nei poani, cuiishasha jehusejjajea majje pojjeama. ¿A'a miquianaaya cuiishasha jehusejjajeaña? ¿A'a mimishi pajea'yonaje pea'ai? ²⁹ Eyacuiñajjija esohui jayojja jama añajo ca ca miquianaya ojaya epeeji nei poani. Beca cuanaja cuiishasha jehusejjajea jjima; jamatii Edojjashahua Pameya pea jjashahuabaquime po mee ca'yani Jesusaja epeeji nei epojji. Jamajjeya miquianaya Jesusaja epeeji e'e jojo nei poani. Pea cuaa pojja'a miquianaya Jesusaja epeeji pojjeama poso acani, miquea cuiishasha jehusejjajea

jjimajojo. Jamatii Eyacuiñajjija eba miquianaya ojaya epeeji nei poani.

Jamajjeya ojjaña joya Eyacuiñajjija esohui jayojja jama ba'yani ojaya epeeji nei poani, Jodio cuana, Jodio pojjeama cuana pea'ai, ecuiishasha jehuissejjajea'yo cuana, ecuiishasha jehuissejjajea'yo pojjeama cuana pea'ai.

3

Eyacuiñajji e'e jojo nei, quea ja'a nee nee poani

¹ Jodio cuana, ¿a'a miquianaya jjashahuabaquiani? Jama ba'a: —Eyacuiñajjiya Jodio pojjeama cuana ojaya epeeji nei po mee cani ecuana jayojjaya. Jamajjeya ¿apiojji acuae etiiquianaja ehuohui'yo jayojja jama cuiishasha jehuissejjajeaña? ¿A'a Jodio pojjeama epojji quea pame nee nee, Jodio epojji quea pame pishana? —miquianaya pojja'a jamaya poani.

² Quea pame nee Jodio epojji. ¡Bacue! Eyacuiñajjiya eseya Jodio cuana yahuaajo nei nei ojaya esohui etehue'yo ba mee ca poa, ba majje pea cuana huasijje ehuohui'yojji pea'ai. ³ E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique ose-cua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Eseyaya etiiquiana Eyacuiñajjija esohuijo shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

⁴ ¡Chojja de! Dejja cuana siajje poani, ojjaña. Eyacuiñajji ca ca siajje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuiaña tii tii. Miquea ejjashahuabaqui'yojji ba majje ojjaña ba caje miya e'e jojo nei poani, siajje po ajja nei nei”.

Jamaya Eyacuiñajji esohui yahuajo nei tehue ca poa.

⁵ Jodio cuana, miquianaya jjashahuabaquiani quea quehua, de; jamaya poso nequiana jjabaquiani ba'a: —Ecuana quea mimishi poanijo, ojjaña Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecuana quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jjashahuabaquiani, quea quehua.

⁶ Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jjima aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje. ⁷ Jamatii miquianaya quea quehua jjashahuabaquiani jama pea'ai ba'a: —E siajje poanijo pea cuaa Eyacuiñajji bihuia cani jama ba'a: “Eyacuiñajji oe nei siajje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo siajje poanijo? —miquianaya aje jja oe jamaya poani.

⁸ Cho, jamaya pojjeama. Jamaya e'e nei poa joj-jemo, ca ca e siajje poanijo pea cuaa Eyacuiñajji bi-huia cani ecuana siajjepojji pome. E'e, beca cuaa aje oe eya niñeba cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahua-jji!” —onaaya jama eya niñebameya acani. Cho, eya jamaya po ajja. ¡Jamaya niñeba canijo, Eyacuiñajjiya oya cuana quea nee nee capo mee cahua, de!

Eyacuiñajjiya ojjaña cuana ba cani shajjama' jay-ojja

⁹ Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya jama poani. Ojjaña shajjama' nei nei pea'ai poani. ¹⁰ Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuaa. Chama' joya quea pame poani. ¹¹ Ecuea esohui e'e nei ba sa po ajjajo ojaya ba jjima ecuea ejjashahuabaqui'yojji. Oya cuana e ba sa po'yo ajja pea'ai. ¹² Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. ¹³ Ojjaña esohui quea tai nee nee acani. Quea tai nee nee ojjañaja esohui, aquiana quea ihui jayojja. Ojjaña siajjepojji pea'ai, siajje popajea'yo ajja pea'ai. Ojjaña mimijajiji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani

jayojja jama ojjaña cuaa onaya quea yeno po mee cani. ¹⁴ Ojjaña quea tecue nee nee poani, panajajiani pea'ai. ¹⁵ Oya cuana quenequene cuaji majje jjaquecuaquiani. ¹⁶ Oya cuana aje oe ona quea mimishi pomeejji poani; ojjaña quea yeno nee nee po mee cani. ¹⁷ Ojjaña quea bei ba'e ajja tii tii. ¹⁸ Ejo jjashahuabaqui ajja tii tii, jjashajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

¹⁹ Jamatii esejaya eba Jodio cuana jama siajje poani ba'a: —Eyacuiñajjiya esohui Moisesija etehue'yo jayojja jama ecuanaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

²⁰ E'e, Eyacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Eyacuiñajji ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei aña. Jamajjeya miya quea pame nee nee —jamaya mimi ajja Eyacuiñajji. Chojja, ojjaña shajjama' poani, ojjaña tii.

*Jesosa nijje e'e jojo nei jjapeequianijo
Eyacuiñajjiya esejaya mimishi cuijea caje'yo*

²¹ Yahuajo nei nei Eyacuiñajjiya esohui huohuijjiya, Moisesiya pea'ai jama sohuihuoime aca poa ba'a: “Ojjaña joya e'e jojo nei onijje jjapeequiani Eyacuiñajjiya quea boejea po mee caje'yo” yahuajo jama huohuimeya aca poa. Jamatii ojjaña jjashahuabaquinaje Eyacuiñajjiya ojjañaja mimishi cuijea caje'yo Moisesija esohui etehue'yo jayojja jama añajo poso. ²² E'e, Eyacuiñajjiya esejaya mimishi cuana cuijea cani jama huohuime amajje ba'a: —Ecuea eba Jesosa Quitoqua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Eyacuiñajjiya. ²³ Ojjaña cuana ojjaña meshijo ba'e quea mimishi nee poani. Jamajjeya Eyacuiñajji ojjaña cuana nijje quea bihui pojjeama, o jayojja jama po ajjajojo. ²⁴ Jamatii Eyacuiñajji quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yojji sosejje mano'yonajejo. ²⁵ E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajjajja equecua'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajji jama poani

ba'a: —Mimishi cuana sosequia'yojji oe dejja ca-manoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoa canaje; mimishi cuijea'yo jjima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejja mimishi cuana jjashahuaba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeya ca ca Jesosa Quito mano'yonaje mimishi cuijea'yojji sosejje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiiquianaja mimishi pajea ca'yonaje. ²⁶ Jjeya pea'ai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesusaja epeejji cuanaja mimishi cuana cuijea ca'yani. Eyacuiñajji jama poani ba'a: —Jesosa miquea mimishijo mano'yonajejo, eyaya miquianaya baña mimishi'ama —Eyacuiñajji poani.

Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo

²⁷ Eseyaya jama po ajja ba'a: —Eyaya ca eya Moisesija etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. ²⁸ Jamajjeya esejaya eba jama ba'a: Jesusaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesija etehue'yo jayojja jama

ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesija etehue'yo jayojja jama ba'yani tii.

²⁹ Jodio cuana, eyaya miquiyanaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea caní, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjañaja mimishi cuijea caní Jesosa nijje jjapeequianijo. ³⁰ Ohuaya ojjaña acani oya jayojjaya Jodio cuana, Jodio pojjeama cuana pea'ai. Jamajjeya Jesosa nijje jjapeequianijo, Eyacuiñajjiya eseya ba caní emimishi cuijea'yo, Jodio pojjeama cuana pea'ai, de. ³¹ Jamajjeya eseya, Jodio cuana Jesosa nijje jjapeequianijo, ¿a'a Eyacuiñajjiya esohui etehue'yo jayojja jama ca'apajea'yahua? Chojja de. Jesosaja epeeji poanijo ca ca eseyaya ojaya esohui jayojja jama ejja'aqui o quea bihui nee epo meeji.

4

Onijje jjapeequianijojo Eyacuiñajjiya Amajamaja mimishi cuijea ca'yonaje

¹ ¡Jashahuabaquicue Amajamajo, esejaya etiiquianajo, ma ojjaña Jodio cuanaja etiiquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeeji nei.

¿A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? ² Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama

ba'ya poajo poso miqúiaaya aña. Chojja. Eyacuiñajjiya Amajama jama aca poa ojaya esohui etehui'yo joyajja jama ba'ya poa jójjemo Amajama jama mimime poquiaye ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja añajo, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Beca cuana jamaya jjashahuaba quehuaquiani. Eyacuiñajji ca ca jamaya jjashahuabaqui ajja. ³ Ojaya esohui yahuajo etehue'yo jama poa ba'a: —Amajama Eyacuiñajji nijje jjapeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

⁴ ¡Bacue! Dejja chachacoajo, casosequia cahua echacomeejjiya. Echacomeejjiya sosequia cani jamatii pojjeama, chaco sosejje, de. ⁵ Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo sosejje pojjeama. Chojja. Jesosa nijje jjapeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nijje mimi jeahuajo, onijje jjapeequi jeahuajo pea'ai. ⁶ Maya esejaya etiiquiana Dabi bajjanija eba poa. Jamajjeya jama jjashahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yani sosejje pojjeama Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. ⁷ Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana. Quea boejea'yo po mee canijo, quea bihui nee nee capoahua. ⁸ Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”.

Jamaya esejaya etiiquiaa Dabiya tehue ca poa yahuajo nei.

⁹ ¿A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje jjapeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) ¹⁰ ¿Ache shono acuae Eyacuiñajjiya Amajama ba ca poa emimishi cuijea'yo? ¿A'a cuiishasha biso nei jehuissejjajea cajo pojja'a? ¿A'a jehuissejjajea jjimahuajo pojja'a oya emimishi cuijea'yo ba ca poa, Eyacuiñajjiya?

¹¹ Cuiishasha jehuissejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai jehuissejjajea mee ca poa? Jama ba'a: Quijje Amajamaa jamaya aca poa onajaya ebajji oya Eyacuiñajji nijje jjapeequianijo ca ca oe ohuaya oya emimishi cuijea'yo ba ca'ya poa, cuiishasha jehuissejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nijje jjapeequianijjojo Eyacuiñajjiya eseya ba cani quea boejea'yo, cuiishasha ejehuissejjajea'yo pojjeamajo, de. Jamajjeya Amajama Jodio pojjeama cuanaja etiiquiana jayojja jama esejaya pea'ai, ca Jesusaja epeeji

poanija. ¹² Oya Amajama esejaya, Jodio cuanaja etiquiana poa. Jamajjeya Amajamaa jayojja jama cuiishasha jehuissejjajeaña eseyaya, Jodio cuaaya. Amajama Eyacuiñajji nijje jjapeequia poa cuiishasha jehuissejjajea jjimahuajo. Jamajjeya Jodio cuana jjeya Amajamaja osecua nei poani Jesosa nijje jjapeequiani jojoya, cuiishasha jehuissejjajea majje pojjeama.

Eyacuiñajjiya ojaya esohui jayojja jama acaje'yo esejo, onijje jjapeequiajo

¹³ E'e, yahuajo nei onijje jjapeequianijo Eyacuiñajjiya Amajama ba ca poa mimishi'ama. Ojaya ehuhui'yo jayojja jama po jjimahuajo ca ca Eyacuiñajjiya Amajamaja mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: “Amajama, eyaya miya, mique osecua cuana pea'ai emeshi mese po meeña ojjaña meshi yasijje” Eyacuiñajjiya jamaya aca poa Amajama onijje jjapeequianijojo. ¹⁴ Jamajjeya ojjaña Moisesija etehue'yo ajji poani oe nei eyajo eba'e tiitii mee'yojji jojjemo eseya Jesusaja epeeji cuana eyajo ba'e tiitii'yo jjima pome, Eyacuiñajjiya ma Amajama nijje ohua huohui ca poa jama e'ajji pojjeama pome pea'ai. ¹⁵ E'e, Moisesija etehue'yo jama a'ajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jjima jojjemo shajjama' cuana chama' pome. Chama' joya esohui etehue'yo jayojja jama ba'yani.

¹⁶ Jamajjeya Eyacuiñajjiya quea pame huohui ca poa ojjaña onijje jjapeequianijo. Eseyo ojaya quea jea nee nee. Oya siajje po ajja nei nei

pea'ai. Jamajjeya ma ohua Amajama nijje huohui ca poa jayojja jama ohuaya acaje'yo e'e jojo nei Amajamaja osecua cuana nijje. E'e, ohuaya jamaya acaje ojjaña ese nijje, Jesosa nijje jjapeequianijo; Jodio cuana nijje, Jodio pojjeama cuana nijje pea'ai. E'e, Jesosa nijje jjapeequianijo eseya Amajama jayojja, Eyacuiñajjiya epeeji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana. ¹⁷ Eyacuiñajjiya esohui ma ohua Amajama huohui ca poa ohuaya yahuajo nei tehue mee ca poa jama ba'a: “Amajama, eyaya miya ojjaña dejja cuanaja, pea jaajjiya esohui mimianija etiquiana po meeje'yo, ojjañaja etiquiana”. Jamaya Eyacuiñajjiya yahuajo nei tehue mee ca poa ojjaña ojaya epeeji cuanaja. Jamajjeya onijje jjapeequianijo, Eyacuiñajjiya eseya Amajamaja osecua cuana po mee cani. E'e, ohuaya quea ca'a nee nee, ojjaña acani. Emano'yo cuana shequi mee ca'yani; ojjaña aquiana ma yahuajo chama' poa ohuaya pana cani, Eyacuiñajjiya.

¹⁸ Jamajjeya Amajama tii nojinoji'ya poa bacuama' tii. Jamatii Eyacuiñajjiya oya huohui ca poa jama ba'a: “Amajama, miquea osecua cuana quea huiso nee nee poaje. Emeshi mese cuana poaje'yo ojjaña meshi cuana huasijje” jamaya Eyacuiñajji poa. Jamajjeya Amajama jjashahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Ama-

jama quea osecua huiso nee nee po mee canaje, majameta huisoajja sico meemee ajja, quea huiso nee nee. ¹⁹ Eyacuiñajjija esohui shajja'ajja majje Amajama jjashahuabaquia poa jama ba'a: —Eya etii nei nei, 100 shequiajame etii. Ecuea ehuanase pea'ai etii nei, bacuama' pea'ai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, dejja —Amajama poanaje. ²⁰ Jama po majamajanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe siajje po ajja nei nei —jamaya mimi majamajanajejo Amajama Eyacuiñajjija epeeji quea ca'a nee nee poanaje. Bi-huia ca poa jama ba'a: —E'e Eyacuiñajji, jamaya. Miyaya eya quea pame nee añã tii. ²¹ E'e, miyaya quea ca'a nee nee poanijo, miquea ehuhui'yo jayojja jama aje'yo e'e jojo nei.

²² Amajama jamaya jjashahuabaquianijo, Eyacuiñajjiya oya huohui ca'ya poa: “Amajama, miya enijje jjapeequianijo, eyaya miya baña mimishi'ama. Miquea mimishi ecuijea'yo” Eyacuiñajjiya oya aca poa.

²³ E'e, Eyacuiñajjiya huohui ca poa Amajamaja ebajji jama ba'a: “Enijje jjapeequianijo eyaya miya baña mimishi'ama” Eyacuiñajji poanaje.

²⁴ Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijje jjapeequianijo. Jamajjeya esejaya eba Amajama jayojjaya onijje jjapeequiajo, Eyacuiñajjiya eseya jama acaje pea'ai ba'a: “Eyaya miya baña mimishi'ama pea'ai” Eyacuiñajjiya eseya acaje,

de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emano'yojaa shequi mee ca o'oyanaje. ²⁵ E'e, ojjaña quea mimishi poanijo, Eyacuiñajjiya Jesosa huoojea canaje emano'yojji esejaya mimishi sosequia'yojji. Majoya Eyacuiñajjiya oya shequi mee ca o'oyanaje. Shequi o'oya majje Jesosa jama poanaje ba'a: —Ecue Chii, ¡bacue! Ecuea epeeji cuanaja mimishi cuijea'yojji sosejje eya mano'yonaje. Oya cuana jjeya mimishi'ama enijje jjapeequianijo —oya Jesusaa acanaje.

5

Eyacuiñajjiya eseya mimishi'ama ba cani

¹ E'e, Jesosa nijje jjapeequianijo, Eyacuiñajjiya eseya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje. ² Jesosa nijje jjapeequi majje eseya Eyacuiñajji nijje mete'ama mimiani. Esey a jama poani ba'a: —Jesosa ecuanajo mano'yonajejo, ecua na Eyacuiñajji jo mete'ama; oya ecua na nijje quea bei nee po mee canaje Jesusaa. Cuanaya ecua na quea bihui nee jjashahuabaquiani quea ja'a nee jama ba'a: “Eyacuiñajjiya e'e jojo nei ecua na ba'e tiitii mee caje'yo onijje eyajo” —jamaya eseya poani.

³ Jesosa nijje jjapeequianijo, pea cuaa eseya napa cani. Quea camaja poani. Jamatii eseya quea bihui nee poani, yeno'ama. Dejja mimishiya napa cajje eseya Jesusaja epeeji quea ca'a nee poaje'yo.

⁴ Eseyá quea bihui nee Jesosa nijje j̄japeequi pa-
jea'yo aj̄ja jamatii onaa napa cajo, Eyacuiñaj̄jiya
eseya huohui cani jama ba'a: —E'e, jamaya miya
quea pame nee poani.

Eyacuiñaj̄jiya eseya quea pame ba canijo, eseya
jama poani pea'ai ba'a: —E'e jojo nei Eyacuiñaj̄jiya
eseya onijje ba'e tiitii mee caje'yo eyajo.

⁵ E'e, esejaya eba Eyacuiñaj̄jiya ojaya ehuo-
hui jayoj̄jaya acaje'yo. Ohuaya Edojjoshahua
Pame huoojea canaje ese ba meeji jama ba'a:
—E'e jojo nei Eyacuiñaj̄jiya oja sohui jayoj̄jaya
acaje'yo; miquianaya onijje ba'e tiitii mee caje'yo.
Miquianaya ojaya quea jea nee nee —jamaya es-
eya Edojjoshahua Pameya j̄jashahuabaqui mee
cani.

⁶ E'e, Jesosa mano'yo j̄jimahuajo eseyaya Ey-
acuiñaj̄ji quene'ama epo meeji poj̄jeama ese nijje,
¿achaj̄ja shai quene'ama epo mee'yoj̄ji? Yahuaajo
Eyacuiñaj̄ji j̄jashahuabaquinaje jama ba'a: —
Eyaya ma eshequiajajo, ma poj̄jajo Jesosa huoo-
jeaje'yo shaj̄jama' cuanajo mano'yohua. Ecuea
eba epoj̄ja Jesosa manoj̄e'yo —jamaya Eyacuiñaj̄ji
poanaje.

Jamaj̄jeya ma poj̄jajo tii Jesosa mano'yonaje
eseja mimishi cuijea'yoj̄ji sosej̄je. ⁷ ¡Bacue! Be-
shahua nei eseya mano'yo sa po aj̄ja pea mano'yo
j̄jima epoj̄ji. E'e poj̄ja'a oya quea pame nee nee
ba'yanijo, ojo beca cuana mano'yome. ⁸ Jamatii
eseya Eyacuiñaj̄ji quea jea nee nee poanijo
ohuaya jama acanaje ba'a: Ecuana quea mimishi
poanijo tii oya, Jesosa mano'yonaje eseja mimishi
cuijea'yoj̄ji sosej̄je. ⁹ E'e, Jesosa esej̄o mano'yonaje
eseya quea mimishi poanijo tii. Ojaya ena'

cuayaquinaje eseja mimishi cuijea'yojji. Jamajjeya eseja mimishi cuijea'yo majje Eyacuiñajjiya eseja ba cani mimishi'ama. E'e jojo nei. Jjeya ca ca oya ese nijje quene'ama; cuaqui yasijje ehoojeajji pojjeama, de. ¹⁰ E'e, yahuajo ese nijje Eyacuiñajji quea quene nee poa. Ese shajjama' poanijo tii Jesosa eseja mimishi cuijea'yojji sosejje mano'yajo, Eyacuiñajji ese nijje quea quene popa-jeanaje. Jamajjeya Eyacuiñajji ese nijje quea bei poanijo, eseyaya baña jama ba'a: Jesosa shequi mee ca o'oyanajejo, e'e jojo nei Eyacuiñajjiya eseya ba'e tiitii mee caje'yo onijje pea'ai. ¹¹ E'e, Jesosaa, Emeshi Mese neiya esejaya mimishi cuijea ca'yonajejo, Eyacuiñajji quea bei nee ese nijje, epeeji nei po mee cani. Jamajjeya eseja quea bihui nee jama poani ba'a: —Eyacuiñajji, miya quea pame nee; ecuana quea jea nee nee poani.

Yahuajo eseja Adana jayojja ba'ya poa; jjeya ca ca eseja Jesosa jayojja ba'yani

¹² ¡Bacue! Yahuajo nei nei Adana ba'ya poa. Oya ojjañaja ejeajji poa. Oya Adana ebionei shajjama' poa. Jamajjeya esejaya ejeajji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: “Miya shajjama' poanijo, manojeyo ojjaña” Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. ¹³ E'e, Adana ebionei shajjama' poa. Moisesiya Eyacuiñajjiya esohui tehue jjimahuajo, jamaya ojjaña po poquia poa, quea mimishi. Yahuajo Moisesiya esohui tehue jjimahuajo, Eyacuiñajji etiquiana nijje jama mimi jjima ba'a: —Ecue sohui

jama ba'e ajjajo miquianaya shajjama' —jamaya Eyacuiñajji etiquiana nijje mimi jjima yahuaajo, maya tehue jjima poa Eyacuiñajjija esohui.

¹⁴ E'e, Adana shajjama' po majje, Moisesija esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjija esohui shajja'ajja jjimajo Adana jayojja jama pojjeama. Adana ca ca Eyacuiñajjija esohui shajja'ajja majje shajjamaa jjejojo acuijjajja ijja ca poa, de. Eyacuiñajjiya Adana ebionei pana ca poa. Quijje ohuaya oja Bacua Jesosa huoojea canaje. ¹⁵ ¿Ae poanaje Adana? ¿A'a Adanaa jayojja jama acanaje Jesusaa? Chojja, quea pame nee nee eseya acanaje, Jesusaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña mano jeyojeyo mee ca'ya poa. Mano'yo majje cuaqui yasijje poqui ca'ya poa. Jjeya Jesosa Quitojo eseya ba'e tiitii mee cajeyo Eyacuiñajjiya. E'e, eseya Eyacuiñajjija quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseja mimishijo mano'yohua mimishi cuijea'yojji.

¹⁶ E'e, Eyacuiñajjiya eseya quea jea acanijo Jesosa huoojea canaje mano'yohua eseja mimishi cuijea'yojji sosejje. Jamajjeya eseya quea mimishi po huicha'a huicha'a majje, jamatii Eyacuiñajjiya eseya huohui cani jama ba'a: —Eyaya miya baña emimishi cuijea'yo.

Adana ca ca shajjama' po coa poajo, Eyacuiñajjiya oya huohui ca'ya poa jama ba'a: “Adana, miya ca mi ca oe shajjama'. Jamajjeya miya manojeyo; quea nee nee poaje'yo. Mique osecua cuana pea'ai mi jayojjaya mano'yomeya

poaje; jama mano'yomeya popoquije'yo mique osecua cuana” poanaje. ¹⁷ E'e, oe dejja quea mimishi po coa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa Quitohua ca ca eseya quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuanajo mano'yonaje mimishi cuijea'yojji sosejje. Ohuaya eseya ba'e tiitii mee caje'yo onijje. Jesosa nijje ona huoojea'yojji po mee caje'yo, Eyacuiñajjiya.

¹⁸ E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama'. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yojji mano'yonaje. Jamajjeya Jesosa nijje jjapee neineiquianijo, Eyacuiñajjiya esejaya mimishi cuijea majje mimishi'ama ba cani. Mimishi cuijea'yo majje eseya ba'e tiitii mee cani onijje eyajo. ¹⁹ Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejjaa, Jesusaa ca ca oja Chiija, Eyacuiñajjiya esohui jayojja jama aca poa. Jamajjeya eseyaya, ojaya epeejji cuaa Jesusaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseya ba cani mimishi'ama.

²⁰ Adana shajjama' poajojo quijje nei nei Eyacuiñajjiya Moisesi tehue mee ca poa ojaya esohui. Ojaya esohui tehue mee ca'ya poa ojjañaja ebajji oya cuana Eyacuiñajjiya esohui jayojja jama a'ajja tii. Jamatii esohui ba majje ojjaña quea mimishi tii tii poani. Eyacuiñajji ca ca quea pame po tiitiani ojjaña nijje. Quea mimishi tii poanijo aje

oe jamatii ohuaya eseya quea jea nee nee acani tii. ²¹ Yahuajo esohui etehue'yo ba majje jamatii etiiquiiana cuana mimishi pajea sa po'yo ajja poa. Jamajjeya oya cuana mano'yo majje cuaqui yasijje poqui'yonaje. Eyacuiñajjiya ca ca eseya shajjama' poani tii quea jea nee acanaje. Esejaya Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yojji.

6

¡Mimishi pajea'yocue; Jesosa nije jjapeequicue!

¹ Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi capoahua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

² ¡Chojja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nije jjapeequi majje mimishi sa po maja'yo ajja. Cajaa seya año. ³ E'e, eseya Jesusajo besa majje, ohuaya eseya ba cani ojaya epeeji mimishi po maja sa po'yo ajja. ¿A'a miquea maya ba jjima?

—E'e, eya Jesosa nije jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nije jjapeequianijo. ¿A'a miquea maya ba jjima?

⁴ Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea

ca'a nee nee. Jesosa shequi mee ca'yonaje jama jayojjaya ohuaya eseya pea jjashahuabaquime po mee ca'yani Jesosa nijje jjapeequianijo. Jesosa nijje jjapeequiajo pea'ai onaaya eseya enajo besa mee cani Eyacuiñajjijo. Jamajjeya Jesosaa eseya ba cani o jayojja e'e jojo nei, yahuajo jama pojjeama. Pea jjashahuabaquime poani, de; mimishi po maja sa po'yo ajja.

⁵ Jamajjeya eseya jama poani ba'a: —Jesosa Quito acui ecueata'apeejo mano'yonaje eseja mimishi cuijea'yojji. Jamajjeya eseya onijje jjapeequi majje mimishi pajea neinei sa poani. Eyacuiñajjiya Jesosa shequi mee ca o'oyanaje; ba'e mee ca o'oyanaje. O jayojja jjashahuabaqui meeme po mee ca'yani. ⁶Jamaya esejaya eba ba'a: Jesosa Quito acui ecueata'apeejo mano'yonaje eseya ojaya epeejji quea ca'a nee epo meejji, mimishi pajea neinei meesahua'yojji. Eseyaya eba'e yahuajo, ejjashahuabaquiiji yahuajo jayojja jama pajea mee ca'yonaje, eyacua po mee canaje. Yahuajo jama poanaje ba'a: Jiquio ecua sosema' chacochoani echacomeejjija yajjijo chacochocho pajea mee jjima acani jayojja jama yahuajo eseya mimishi pajea'yo jjima poanaje. ⁷ Jama ba'a: Ese ejjaa mano'yo majje mimishi amaja ajja. Oya jayojjaya eshahuaja epeejji emano'yo jayojja jama Jesosaa eseya po mee cani ojaya epeejji nei epojji.

⁸ Jamajjeya onijje jjapeequi majje Jesosa Quito mano'yonaje jayojja jama ecuana eshahuaja epeejji poanijo emano'yo jayojja poanaje; Jesosa shequi'yonaje jayojjaya eseya o jayojja ba'yani, yahuajo jama pojjeama. E'e jojo nei eseya onijje ba'e tiitiije'yo eyajo; o jayojjaya pea'ai

poaje'yo. ⁹ E'e, Jesosa emano'yojaa Eyacuiñajjiya oya shequi mee ca o'oyanaje. Eshe nequi'yo, emano beca'yoyji pojjeama. Pea cuaa oya mano mee'yo jjima acaje'yo. ¹⁰ Oya mano'yonaje; oe nei mano'yome poanaje esejaya mimishi cuijea'yoyji. Oya Jesosa mano beca'yo ajja. Jjeya oya eshe'yo; Eyacuiñajjiya ejjashahuabaquijji jayojja jama atiitii cani. ¹¹ Jamajjeya ojjaña Jesusaja epeeji cuana, jjashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajoshajo'yo ajja jayojja jama Jesusaja epeeji cuana mimishi po maja sa po'yo ajja. Pea jjashahuabaquime po'yani, de. Jjeya Jesosa nijje jjapee neineiquianijo eseyaya o jayojjaa Eyacuiñajjiya ejjashahuabaquijji jayojja jama atiitiaña.

¹² Jamajjeya eshahuaa miquianaya shajjama' po mee sa acanijo, ja'a shajjama' pojji! Chojja. ¡Ejjashahuabaquijji yahuajo quea tai, quea mimishi jayojja jama a'a pojji! ¹³ Eshahuaa miquianaya quea mimishi o jayojja jama po mee sa acani. ¡A'a jjashajja'ajjaquijji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jjashahuabaquime po mee ca'yani. Jamajjeya ¡ba'ecue ojaya ejjashahuabaquijji quea pame nee jayojja jama! ¹⁴ E'e, Eyacuiñajjiya huohui canaje jama ba'a: — ¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meemee'yo ajja. Eyacuiñajjiya ca ca oe eseya quea jea nee acani; mimishi pajea

meesahua ca'yani. Jamajjeya ¡eshahuaa miya shajjama' po mee sa acanijo a'a jjashajja'ajjaquijji! Jjeya oya, eshahua ese huoojea'yoyji pojjeama, de. Eyacuiñajji ca ca esejaya Emeshi Mese nei, ese huoojea'yoyji poani.

Eyacuiñajjija echacojji quea pame

¹⁵ Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui jjima jama ba'a: —Esohui etehue'yo jayojja jama ba'yanijo, eyaya miquianajaya mimishi cuijeaje'yo —jamaya jjeya huohui jjima Eyacuiñajjija.

Jamajjeya ¿ae jjashahuabaquiani eseya? ¿A'a quea mimishi capoahua? ¹⁶ Chojja de. ¡Bacue! Jiquio ecua echacomeejji nijje poquijajo, ohua mee'ajja cajje miya chacochocho majje miya ojaya echacojji poani, oya mi huoojeajji poani jama jayojjaya eshahuaaja esohui jayojja jama añajo miya ojaya epeeji poani, oya mi huoojeajji poani. Miya jamaya po majje quea nee nee poaje'yo quijje cuaquijo. ¡Eyacuiñajji mi huoojeajji poanijo ojaya esohui shajja'ajjacue! Ohuaya miya quea boejea ba'e mee caje. Majoya miya ba'e tiitii mee caje'yo eyajo, Eyacuiñajjiya. ¹⁷ Jamajjeya eyaya Eyacuiñajji bihuiaña ohuaya miquianaya eshahuaajo nahue canijo. E'e, yahuajo eshahua mi huoojeajji poanijo shajjama' poanaje. Jjeya ca ca ecuea esohui shajja'ajja majje Eyacuiñajjija esohui e'e nei jayojja jama ña quea bihui nee. ¹⁸ Jamajjeya Eyacuiñajjiya miquea eshahua poqui mee ca'yonaje, mi huoojeajji pojjeama po mee ca'yonaje. Jjeya

Eyacuiñajji mi huoojeajji poani. O jayojja ba'e mee ca'yani. Jamajjeya miyaya ojaya esohui jayojjaya jama aña quea bihui nee. ¹⁹ Miquea eba neinei-jji eyaya quea ja'a esohui huohuiaña jama ba'a: Yahuajo eshahua mi huoojeajji poanaje, miyaya o jayojjaa ojjaña mimishi a sa anaje, quea ja'a jjashahuabaqui sa po ajja poanaje. ¡Jjeya ca ca Eyacuiñajji mi huoojeajji nei nei a'yocue! ¡Ojaya ejjashahuabaqui'yojji jayojja jama atiitiicue quea pame nee eba'e'yojji!

²⁰ Yahuajo aje oe eshahua mi huoojeajji poanijo, miqúanaya quea pame po sa po'yo ajja nei nei poanaje. ²¹ Eshahua jayojja jama quea mimishi ba'enajejo ¿a'a quea bei po tiitii mee canaje? Cho. Jjeya ma ecua ese ba'enaje jamajo eseya quea bicho nee nee poani. Jamaya eba'e tiitii jojjemo Eyacuiñajjiya eseya cuaqui yasijje huoojea ca'yoquiaye. ²² E'e, yahuajo eshahua mi huoojeajji poanaje. Eyacuiñajjiya miquea eshahua poqui mee ca'yonaje. Jjeya ca ca Eyacuiñajji mi huoojeajji poani. Oya shajja'ajjañajo, ohuaya miya quea boejea'yo po mee cani; ba'e tiitii mee caje'yo eyajo. ²³ Eyacuiñajjiya shajjama' cuana huoojea caje'yo cuaqui yasijje eshahua nijje quea mimishi poanaje sosejje. Pea ca ca jama ba'a: Eseyá jamatii quea pame ba'e meeme ajja. Emeshi Mese nei Jesosa Quito nijje jjapeequianijo, Eyacuiñajjiya eseya o jayojja jjashahuaba meequi ca'yani; eseya ba'e tiitii mee caje'yo eyajo onijje. E'e de, eseya jamatii quea pame nee ba'e neinei ajja.

Esohui eba meesahuajji epona ahuejjijo

¹ Ecuea epeeji cuana, Eyacuiñajjija esohui etehue'yo miquianajaya eba. Jamajjeya jama baña ba'a: Eseyá eshe nequijo ca ca oe esohui etehue'yo jayojja jama caba'yahua tii, mano'yo majje pojjeama. ² Miquiana ba meesahuajji eyaya jama huohuiaña ba'a: Eyacuiñajjiya jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jjimajo, pea nijje a'a jjahueaqui mee'yojji! ¡O mano'yajo ca ca peajo cajjahueaqui'yahua! ³ Ojaya yahue mano'yo jjima eshe nequi tiijo, peajo jjahueaqui nisho'yanijo, oya ehuanase pea cojjojji poani. Ojaya yahue mano'yo majje ca ca oya e'ahuemano. Oya ahuema' jayojja peajo cajjahueaqui'yahua. Jjahueaqui o'oya majje pea cojjojji jayojja jama pojjeama —jamaya huohui canaje yahuajo nei Eyacuiñajjiya.

⁴ Jamajje ecuea epeeji cuana, miquianajaya eba neineiiji eyaya jamaya huohuiaña. Jesosa nijje jjapeequianijo epona e'ahuemano jjahueaquiani jayojja jama poani. E'e, yahuajo Jesosa ba jjimahuajo eseya quea quehua jjashahuabaquinaje jama ba'a: —Eyacuiñajjija esohui etehue'yo jayojjaya jama atiitiaña, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeya ca ca Jesosa esejaya mimishi cuijea'yojji sosejje mano'yonajejo yahuajo jama jjashahuabaqui ajja, de. Jjeya ca ca pea jjashahuabaquime poani. Jiquio ecua oja yahue mano'yo majje ehuanase peajo jjahueaqui'yani jayojja jama jjeya eseya Jesosa

nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayojja jama eseya pea jjashahuabaquime po mee ca'yani. Jamajjeya eseya jjashahuabaquiani quea pame nee eba'ejji, Eyacuiñajji quea bihui nee epo meeji. ⁵ Yahuajo Jesosaja epeeji po jjimahuajo eseya ba'enaje esejaya ejjashahuabaquijji quea tai jayojjaya. Eyacuiñajji esohui etehue'yo ba majje shajjama' po sa neinei poanaje jama ba'a: “¡A'a pea siijji!” ba majjeya eseya pea sii sa neinei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yojji tii tii pojjeama. ⁶ Yahuajo aje oe eseya mimishi pajea meemee ajja. Jiquio ecua Eyacuiñajji esohui shajja'ajja majje jamatii ameemee ajja. Jjeya ca ca Jesosa esejaya mimishi sosejje mano'yonajejo, eseya pea jjashahuabaquime poani. Eseyaya baña esohui etehue jayojja jama añajo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya pea jjashahuabaquime poani. Edojjoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa aña.

Eyacuiñajji esohui ba neinei majje esejaya eba poa eseya shajjama' nei poani

⁷ Eyacuiñajji esohui etehue'yo ba majje ca ca esejaya eba poa eseya shajjama' poani. Jamatii beca cuana jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba

jjima pome. E'e, Eyacuiñajjija esohui etehue'yo jama poani ba'a: “¡A'a oe onajaya aquiana jea bajji!” poani. Jamatii Eyacuiñajjija esohui ba jjima jojjemo onajaya aquiana jea bañajo Eyacuiñajji enijje quea quene poani ecuea ba jjima pome. ⁸Ma ba majje ca ca eshahuaa eya onajaya aquiana jea ba neinei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. ⁹Yahuajo esohui etehue'yo ba jjimajo eya shajjama' pojjeama poso jjabaquinaje. Quijje Eyacuiñajjija esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

¹⁰Jamajjeya Eyacuiñajjija esohui jama eba'e tiitii jojjemo eseya Eyacuiñajji nijje ba'e tiitii mee'yome. Eyaya ojaya esohui jama ajjima tiitii ijo ca ca eya Eyacuiñajjiya quea nee nee po mee caje'yo. ¹¹Eyaya Eyacuiñajjija esohui etehue'yo jayojja jama a'ajja'yonaje. Chojja, ameemee ajja, de, quea mimishi nee nee. Jamajjeya esohui jayojja jama atiitii jjimajo aje oe Eyacuiñajji enijje quea quene nee nee poaje, eya quea nee nee po mee caje'yo tii tii. ¹²Jamatii Eyacuiñajjija esohui etehue'yo quea pame nee e'e jojo nei, Eyacuiñajjija ejjashahuabaquijji ese quea bihui ba'e meesahua-jji. ¹³Jamajjeya Eyacuiñajjija esohui quea pame ba neinei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjiya ojaya esohui tehue mee ca poa ojjañaja ebajji shajjama' nei nei quea tai nee nee poani cuana jjabahuejjaquijji Eyacuiñajjiya quea nee nee

po mee caje'yo. Jamajjeya esohui ba jjimajo eya shajjama' pojjeama poso jjabaquinaje; ba majje ca ca jamatii eya mimishi po majamaja sa neinei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya aña. ¹⁴Esejaya eba Eyacuiñajjija esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meemee ajja ojaya esohui jayojja. Jiquio ecua echacojji ojaya echacomeejjija esohui jayojja chaco sa po ajja, jamatii jamaya chaco caje jama jayojjaya eya quea mimishi po sa po'yo ajja, jamatii quea mimishi poani. ¹⁵Eyacuiñajjija esohui jayojja jama a'ajja majje eya jjashahuabaquiani jama ba'a: — ¡Dee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jjashahuabaquiani jama ba'a: — ¡Dee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jjashahuabaquiani.

¹⁶E'e de, ecuea eba Eyacuiñajjija esohui quea ja'a nee. Jamajjeya eya quea yeno poani ma esohui jayojja jama mi amajje. ¹⁷Jjeya ca ca ecuea pea jjashahuabaquime quea ja'a poanijo ma ecua eya yahuajo ba'yaninaje jama po sa po'yo ajja. Jamatii ecuea ejjashahuabaqui'yojji quea mimishi; e poaninaje yahuajo pajeapajea'yo ajja. E'e de, ecuea ejjashahuabaquijji quea mimishi yani, de. Cajaa.

¹⁸Ecuea eba jama ba'a: Quea mimishi jjejojo eya jamatii quea ja'a nee jjashahuabaqui ajja tii tii. Eya quea ja'a nee po sa po'yo majje jamaya

eyaya ameemee ajja, de. Quea mimishi nee nee iña, de. ¹⁹ E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. ²⁰ Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'ejji ma ecua eya yahuajo ba'yaninaje jama eyaya atiitiiña.

²¹ E'e, eya quea pame nee Jesosa jayojja ba'e sa poani nei nei. Jamatii eya ca'a'amajo quea pame atiitii ajja. Ecuea ejjashahuabaquijji quea mimishi yani, ma e yahuajo ba'yaninaje quea tai poaninaje. Maya eya pajeapajea'yo ajja. ²² E'e de, Eyacuiñajjija esohui ecuea quea jea nee nee. Maya eyaya a sa aña. ²³ Jamatii ecuea ejjashahuabaquijji jjea jiquio jama ba'a: —Quea pame nee a sa aña Eyacuiñajjija esohui jayojjaya —eya poani. Jamatii jamaya eyaya ameemee ajja. Ecuea ejjashahuabaquijji yahuajo jayojja jama aña, quea mimishi. E'e de, eya quea mimishi nee nee; mimishi cuana pajea'yo ajja. Eya jama poani ba'a: Onajaya esohui quea mimishi jayojja jama eyaya aña tii tii. ²⁴ E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o? ²⁵ Eseyaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuiaña jama ba'a: —Ecue Chii, miyaya eya jaahuanaña quea pame nee nee.

E'e, Eyacuiñajjija esohui jayojja jama a sa aña. Jamatii eyaya jamaya pojjeama atiitiiña. Jesosa Quito ca ca quea ca'a nee nee poani. Ohuaya

eya mimishi pajea meesahua ca'yani. Jamajjeya Eyacuiñajjija esohui jayojja jama eyaya aña.

8

Edojjoshahua Pameya eseya ba'e mee cani Jesosa jayojja, yahuajo jama pojjeama

¹ Jjeya Jesosa Quito nijje jjapeequianijo, Eyacuiñajjiya eseya huohui cani jama ba'a: —Eyaya jja miquianaya emimishi cuijea'yo baña. Jesosa Quito mique mimishi cuijea'yojji poanaje. Quea boejea poanijo, miquianaya ecuea etecueajji pojjeama —Eyacuiñajji poani.

² Yahuajo Jesosa Quitoja epeeji pojjeama poanaje. Yahuajo eseya quea mimishi po tiitiianijo cuaqui yasijje edobiquijji nisho poanaje. Jjeya ca ca Jesosa Quitoja epeeji poanijo, Edojjoshahua Pameya eseya ba'e mee cani o jayojja, mimishi'ama. ³ E'e, eseya quea mimishi poaniya jjejojo Eyacuiñajjija esohui jayojja jama ameeme ajja. Jamajjeya Eyacuiñajjiya eseya quea boejea pojjeama ba cani. Chojja. Esey quea mimishi nee nee poanaje. Jamajjeya Eyacuiñajjiya Jesosa, oja Bacua Ejja oe nei huoojea canaje jiquio meshi yasijje. Oya, Jesosa yamijji dejja jayojja poanaje. E'e, Jesosa ese jayojjaya yamijji poa, jamatii oya mimishi'ama tii. E'e, Jesosa mano'yonaje esejaya mimishi cuijea'yojji, esejaya mimishi sosequia'yojji pea'ai. Jesosaa esejaya mimishi pajea meesahua ca'yanijo, Eyacuiñajji ese nijje quea bei poani. ⁴ Jamaya acanaje Eyacuiñajjiya eseya ojaya esohui etehue'yo quea ja'a nee jayojja jama ameeya,

ojaya ejjashahuabaquijji quea ja'a nee jayojja jama epo meeji pea'ai. Jjeya Edojjoshahua Pameya eseya ba'e mee cani Eyacuiñajjija esohui jayojjaya. Jjeya eseya Jesosa jayojja ba'yani, pea jjashahuabaquime poani, yahuajo jayojja jama pojjeama. Yahuajo quea mimishi poanaje, jjeya ca chojja. ⁵ Beca cuana quea mimishi ba'e sa poani, yahuajo ba'enaje jama. Ojaya ejjashahuabaquijji quea mimishi jama atiitii cani. Mimishi pajea sa po'yo ajja tii. Pea cuaa ca ca Edojjoshahua Pame shajja'ajja cani. Ojaya ejjashahuabaquijji quea pame jayojja jama jjashahuabaquime poani pea'ai. E'e, Edojjoshahua Pameya Jesusaja epeeji cuana jjashahuabaqui meesahua cani o jayojjaya. ⁶ Ojjaña quea mimishi ba'yaniya ejjashahuabaquijji quea mimishi jama atiitii cani. Mimishi cuana pajea sa po'yo ajja nei nei. Jamajjeya cuaqui yasijje poquije'yo. Quea nee nee poaje'yo. Edojjoshahua Pameya eseya Eyacuiñajjija ejjashahuabaquijji jayojja jama po meesahua cani. Jamajjeya eseya ba'e tiitii mee caje'yo eyajo Jesosa nijje quea bei nee nee. ⁷ Ojjaña quea mimishi, quea mimijjequiea jjashahuabaquiani Eyacuiñajjija epeeji pojjeama. Shajjama' cuana, de. Oya cuana Eyacuiñajjija esohui jayojja jama a'ajja tii. Mimishi pajea'yo ajja tii tii. ⁸ E'e, quea mimishi, quea mimijjequiea poanijo, Eyacuiñajji onijje quea bei pojjeama poani.

⁹ Jesosa Quitoja epeeji Shoma cuiñajjijo ba'e, miquianaya yahuajo quea mimishi poa. Jjeya ca chojja. Edojjoshahua Pameya miquianaya ba'e meesahua cani quea pame nee nee, yahuajo jama

pojjeama. E'e, Edojjoshahua Pame Jesusaja epee-
 jji cuana huasijje edobiquinequi. O miquiana
 que dobiqui jjima jojjemo miquianaya Jesusaja
 epeeji pojjeama pome, miquianajaya mimishi
 cuijea'yo jjima pome. ¹⁰ E'e jojo nei Jesosa
 Quito miquiana nijje nequi tiitiani. Ohuaya
 miquianajaya edojjoshahua ba'e tiitii mee caje'yo
 miquea mimishi ecuijea'yojojo. E'e, miquianaya
 mano'yo majje eyami ihuije'yo quea mimishi poa
 jjejojo. ¹¹ Jamatii Eyacuiñajji quea ca'a nee nee
 poani; ohuaya Jesosa emano'yojaa shequi mee
 ca o'oyanaje. Jamajjeya Jesusaja epeeji poanijo,
 ohuaya miquianaya ba'e mee caje o'oya eyami
 eyacua nei. Emano beca'yoyji pojjeama. Jamaya
 poaje Edojjoshahua Pame miquiana huasijje do-
 biqui majje.

¹² Jamajjeya ecuea epeeji cuana, imiquianaya
 Jesusaja epeeji poanijo, pea jjashahuabaquime
 poanijo Eyacuiñajjija esohui jayojja jama acue!
 ¡Yahuajo jayojja jama a'a po o'oyajji! ¹³ E'e, quea
 mimishi po tiitiani, Eyacuiñajjiya eseya quea
 nee nee po mee caje'yo. Edojjoshahua Pameya
 ca ca ojjaña eseya mimishi pajea meesahua
 caje'yo. Jamajjeya mimishi pajea'yo epo
 Eyacuiñajjiya eseya ba'e tiitii mee caje'yo onijje
 eyajo. ¹⁴ Ojjaña joya Edojjoshahua Pame jayojja
 jama jjashahuabaquime poani Eyacuiñajjija
 bacua cuana poani. ¹⁵ Yahuajo, Jesusaja epeeji
 po jjimahuajo eseya quea mete ba'enaje.
 Eshahua jayojja jama jjashahuabaquime eseya
 poanaje. Jjeya ca ca Edojjoshahua Pameya eseya
 Eyacuiñajjija bacua po mee cani. Ohuaya eseya
 mimi meesahua cani Eyacuiñajji nijje jama ba'a:

—Eyacuiñajji, miya ecue Chii e'e jojo nei.

¹⁶ E'e, jjeya Eyacuiñajjiya ba cani eseya oja bacua poani. Edojjoshahua Pameya eseya ba mee cani jama ba'a: —Miquianaya Eyacuiñajjiya bacua cuana poani.

¹⁷ Jamajjeya Eyacuiñajjiya bacua cuana poani-jojo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese nijje jama ba'a: Ojjaña aquiana Eyacuiñajjiya quia ca'yonaje Jesosa Quito que. Maya aquiana esejaya poaje'yo pea'ai Jesosa Quito nijje jjapeequianijo. Onijje jjapeequianijo, pea cuaa eseya napa caje, quea nee nee po mee caje'yo. Jamatii. Ecuana quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa nijje quea ja'a nee eyajo. Onijje ona huoojeajji po mee caje'yo.

Quijje eseya quea pame nee anije'yo eyajo Jesosa nijje

¹⁸ Jjeya eseya jiquiojo tii quea yeno poani, quea nee poani Jesosa nijje jjapeequianijo. Jamatii ja'a quea yeno pojji! Quea pame nee nee eseya ba'e tiitiije'yo Jesosa nijje eyajo.

¹⁹ Adana, esejaya ejeajji quea mimishi poa. Adana quea mimishi poanijo, Eyacuiñajjiya ojjaña ojaya epana'yo cajaa acanaje beshahua nei. Es-eya Eyacuiñajjiya bacua cuana quea ja'a nee, quea ca'a nee Jesosa nijje poanijo, ojjaña aquiana ca-jaa ya'yojji pojjeama po mee caje'yo Eyacuiñajjiya.

²⁰ E'e, yahuajo nei Eyacuiñajjiya ojjaña quea pame nee pana ca'ya poa. Adana quea mimishi poajo ca ca Eyacuiñajjiya ojjaña cajaa aca poa. Quijje

ojjaña aquiana cajaa ya'yojji pojjeama poaje'yo. Ma Eyacuiñajjiya ebionei pana ca poa jayojja ishoa ca ani, ojjaña. ²¹ E'e, jjeya ojjaña aquiana mano'yani, ihui'yani pea'ai. Quijje, Jesosa poe o'oyajo ca ca ojjaña aquiana cuana quea pame nee nee poaje o'oya. Adana quea mimishi po jjimahuajo jama jayojjaya poaje o'oya. Eyacuiñajjiya bacua cuana, ma Jesosa nijje jjapeequiani quea pame nee nee poaje'yo Jesosa poe o'oyajo. Ma shejo ojjaña aquiana ojjaña Eyacuiñajjiya pana'yo quea pame nee nee poaje o'oya. ²² Adana quea mimishi poa jojoya ojjaña aquiana quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuajo ojjaña Eyacuiñajjiya pana quea yeno, quea nee nee poani, jiquio ecua epona bacua cuayani jama jayojja quea nee nee poani bacua cuaya jjimahuajo. ²³ Edojjoshahua Pame dobiqiu'yonaje ese que, Jesusaja epeeji cuana huasijje. Jamatii eseya pea'ai quea nee, quea mano, quea shoe pea'ai poani. Edojjoshahua Pameya eseya ba meesahua cani jama ba'a: Jesusaa poe o'oya majje eseya quea pame nee po mee caje'yo eyacua. Eyacua po'yo majje mano'yo ajja, nee'ama ba'e tiitije'yo eyajo pea'ai. Eyacuiñajjiya esohui ma ecua ohua yahuajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishoaña Jesusaja epoe o'oyajji. Eba'ejji eyacua quea pame nee nee esejaya poaje, de. ²⁴ Jama poaje ba'a: Eyacuiñajjiya eseya mimishi cuijea'yo majje ba'e tiitii mee cani. Eseyaya eyami eyacua amee caje'yo pea'ai, Jesosa poe

o'oyajo. Jamajjeya eseyaya ishoaña ojaya epoe o'oyajji. Jjashahuabaquiani quijje eyacua epojji. ²⁵ Jamajjeya ishoaña tii tii Jesosa ache shono poeje o'oya ebajji. Eyami eyacua yajji eseyaya ishoaña quea bihui nee nee.

²⁶ Cuanaya eseya ca ca ca'a'ama poanijo, Edojjoshahua Pameya quea ja'a nee ba'e meesahua cani. Eba'ejji quea camajajo Eyacuiñajji nijje emimijji esejaya ba jjima. ¿Yajja mimime epojji? Jamajjeya Edojjoshahua Pame esejo mimi neineiiani Eyacuiñajji nijje; eseya mimi meesahua cani Eyacuiñajji nijje pea'ai. ²⁷ E'e, ojjaña esejaya ejjashahuabaqui'yojji mimi meeme ajja quea ja'a nee Eyacuiñajji nijje. Jamatii Edojjoshahua Pameya eseya jjashahuabaqui meesahua canijo, ojjaña esejaya ejjashahuabaquijji Eyacuiñajjija eba nei nei poani. E'e, Edojjoshahua Pame jama poani ba'a: —Eyacuiñajji, Jesosaja epeeji cuana huohui'ajja cani ma oya cuana sa poanijo. Jamajjeya ijamaya acue! ¡Miquea ejjashahuabaquijji quea pame nee jayojja jama acue Jesosaja epeeji cuanajo! —jamaya esejo mimiani Eyacuiñajji nijje Edojjoshahua Pame.

Eyacuiñajjiya eseya Jesosa jayojja jama ba'e meesahua cani

²⁸ E'e, jjeya quea camaja Jesosa nijje ejjapeequijji. Jamatii Eyacuiñajjiya eseya babaca canaje ojaya epeeji epojji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. ²⁹ E'e, yahuajo nei ese pana jjimahuajo Eyacuiñajji esejo jjashahuabaquinaje

jama ba'a: —Ecuea eba a'ya cuae ecuea epee-
jji poaje quijje nei nei. Eyaya oya cuana ecuea
Ebacua Ejja Jesosa jayojja jama ba'e meesahuaje
quea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo,
oya esejaya Edoe Mese poaje, eseya Noo. ³⁰ E'e,
yahuajo nei nei ese cuaya jjimahuajo Eyacuiñajjiya
babaca ca poa ojaya epeejji epojji. Babaca majje
eseya mimishi cuijea ca'yonaje. Mimishi cuijea'yo
majje eseya ba cani mimishi'ama. Ba'e tiitii mee
cani quea ja'a nee, quea ca'a nee Jesosa nijje eyajo,
Eyacuiñajjiya.

Quea pame nee nee Eyacuiñajjiya eseya acani

³¹ E'e, eseya Jesosa nijje ba'e tiitiije'yo quea ja'a
nee o jayojjaya. Quea pame nee nee poaje'yo
esejaya eba'ejji. Eyacuiñajjiya eseya jaahuana tiitii
cani. Oya oe nei quea ca'a nee nee poani tii. Ja-
majjeya eseya onaa napa canijo, jamatii Jesusaja
eseya epajea'yojji pojjeama. ³² Eyacuiñajjiya es-
eya quea jea nee nee acanijo ohuaya huoojea
canaje ojaya Ebacua Ejja Jesosa esejo mano'yohua
ese mimishi cuijea'yojji. Jamajjeya eseyaya jama
baña ba'a: Eyacuiñajjiya eseya quea jea nee nee
atiitii caje'yo; eseya jaahuana tiitii caje'yo pea'ai.
Ohuaya eseya jjapeequi meesahua caje'yo quea
ja'a nee Jesosa nijje. ³³ Eyacuiñajjiya eseya babaca
canaje ojaya epeejji epojji. Jamajjeya pea cuana
esejo emimijajjiji pojjeama Eyacuiñajji nijje jama
ba'a: —Miquea epeejji quea tai. ¡Cajaa acue!

Chojja. Jamaya emimijajjiji pojjeama esejo.
Eyacuiñajjiya eseya emimishi cuijea'yo ba cani.

³⁴ Jesosa Quito mano'yonaje eseja mimishi cuijea'yojji. Emano'yojaa Eyacuiñajjiya oya shequi mee ca o'yanaje, nequi mee ca'yonaje o pejeje eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeeji cuana quea bojea poani, emimishi cuijea'yo —Jesosa poani.

Jamajjeya pea ese nijje emimijajijji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epojji pojjeama ese nijje, Jesusaja epeeji cuana nijje.

³⁵ Esey a Jesosa Quitoja quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeeji cuaa quea mimishiya eseya napa caje Jesusaja esohui huohuijji poanijojo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chacochoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quitoja eseya quea jea nee nee, epajea'yojji pojjeama. Ohuaya eseya jaahuana cani. ³⁶ Beca cuana yahuajo nei quea mase poa. Jamajjeya ohuaya Jesusaja epeeji cuana quecua ca'ya poa. Jjeya beca cuaa quea mase poaniya eseya quecua sa acani Jesusaja epeeji poanijojo. Yahuajo nei nei Eyacuiñajjiya epeejiya esohui tehue ca poa. Eyacuiñajjiya esohui etehue'yo jama poani ba'a:

“Eyacuiñajji, ecuana minijje jjapeequianijo pea cuana jjashahuaba majamajaquiani jama

ba'a: —Cacuiajea'yahua —poani. Jiquio ecua ñajjajja iña majje quecua cani jayojja jama onaaya ecuana acani”.

Jamaya yahuajo nei nei Eyacuiñajjija epeejiya tehue ca poa.

³⁷ Dejjja mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yojji pojjeama Jesosa nijje. Chojja. Eseyá Jesosaja quea jea nee poanijo eseya ojaya epeeji poani. Ohuaya eseya jaahuana cani. ³⁸ Cuanaya esejaya eba e'e jojo nei Jesosa Quitoja, Emeshi Mese neija epeeji poanijo, Eyacuiñajjija quea jea nee nee poani eseya. E'e, jiquiojo ba'e, mano'yo majje pea'ai eseya Eyacuiñajjija quea jea nee. Epajea'yojji pojjeama tii tii. Esohuidojojji cuaa, eshahua cuaa pea'ai Eyacuiñajji ese pajea mee'yojji pojjeama. Ojjañaá jjeja nei aniya, ojjañaá quiije nei poajeya pea'ai Eyacuiñajji ese pajea mee'yojji pojjeama tii. Ojjañaá quea taiya quea mimishiya pea'ai Eyacuiñajji ese pajea mee'yojji pojjeama tii. Eseyá ojaya quea jea nee nee poaje'yo tii tii. ³⁹ Jesosa Quitoja epeeji poanijo, ojjañaá quea ca'a eyajo nequiya, ojjañaá quea ca'a meshijo nequiya, ojjaña Eyacuiñajjija panaa pea'ai Eyacuiñajji eseya epajea mee'yojji pojjeama. Eseyá ojaya quea jea tii tii poaje'yo.

9

Yahuajo nei Eyacuiñajjija Isaeni cuana babaca ca poa ojaya epeeji nei epojji

¹ Eyaya, Pabohua miqiuana que, Jodio cuana huasijje tehueña, ma Shoma cuiñajji ba'e yasi-jje. Eya Jesosa Quitoja epeeji poanijo ecuea esohui e'e nei poani. E'e, Edojjoshahua Pameya eya jjashahuabaqui meesahua cani quea ja'a nee.

² Eya Jodio dejja pea'ai. Jamajjeya eya quea yeno po tiitiani Jodio cuanajo, Jesosa nijje jjapeequi sa po ajjajo. ³ Jodio cuana Jesosaja epeeji epojji eyaya sa neineaña. Jjashahuabaquiani Jodio cuanajo, ecue huapa pojjeama cuanajo jama ba'a: —Eyacuiñajjiya eya cajaa ca'a cahua Jodio cuana cuaqui yasijje poqui'yo jjima epojji. Jamaya Eyacuiñajjiya ya'yo jojjemo eya quea bihui nee pome —eya poani.

⁴ Yahujajo Eyacuiñajjiya Jodio cuana babaca ca poa ojaya epeeji cuana epojji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yojji quea ca'a nee poani tii tii. Jodio cuana nijje mimi majamajanaje jama ba'a: “Enijje jjapeequianijo miqiuanaajaya ebacua cuana quea huiso nee poaje. Jiquio meshi eyaya quiaje miqiuanaajaya enequijji, miqiuanaajaya ose-cua cuana nequijji” Eyacuiñajji poanaje. Quijje Eyacuiñajjiya Moisesi tehue mee ca poa ojaya esohui Jodio cuana quea ja'a nee ba'e meesahuajji. Eti-iquiana nijje miminaje jama ba'a: “Miquianaya e'e jojo nei e bihuiajji poajo, eya miqiuana nijje mimije” Eyacuiñajji poanaje. Cuanaya Eyacuiñajjiya huohui canaje jama ba'a: “Mique ose-cua nei quijje poeje; ohuaya miqiuana ba'e tiitii mee caje'yo onijje” Eyacuiñajjiya jamaya Jodio eti-iquiana aca poa.

⁵ E'e, Jodio cuanaja etiiquiana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quijje Isaeni bajjani aca poa, Isaenija bacua ejja cuana 12 huissome poa, Jodio cuanaja etiiquiana poa. Jesosa Quito cuaya poa dejja jayojja, yamijji, Jodio ponaja mejo poa. Etiiquianaja osecua poa Jesosa, esejaya etiiquianaja osecua. Jjeya oya ojjaña huoojeajji poani. Jamajjeya j'oya ejjabihuaqui tii tii!

⁶ Jodio cuana oe pojji cuana Jesusaja epeeji poanaje. Jamajjeya oe pojji cuanaja mimishi ecuijea'yo poanaje, Jodio cuanaja. Jamatii esejaya eba Eyacuiñajjiya ojaya ehuohui'yo ma etiiquiana cuana nijje ohua huohui ca poa jayojjaya acani Jesusaja epeeji cuana nijje. Jesusaja epeeji cuana ca ca oe Isaeni dejja e'e jojo nei poani, Eyacuiñajjiya babaca. ⁷ Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: "Amajama, Sanaja mejo miquea ebacua Isaaca bajjani poaje. Ojaya osecua cuana quea huissonee nee nee poaje. Oya cuana ca ca mique osecua cuana e'e jojo nei poaje". Jamaya Eyacuiñajjiya aca poa. ⁸ Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeji epojji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ehabaca ecuea epeeji epojji" jamaya ajjima onaya. Chojja. Oe ebacuajo huohui ca poa Eyacuiñajjiya. Ama-

jamaja ebacua Isaaca bajjanijo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya. ⁹ Jama aca poa ba'a: “Amajama, miquea ehuanase etii, bacuama'. Jamatii quiije oya o'ejji poaje. Ecuea eba ache shono miquea ebacua cuayaje, dejja shoi. Apoa poajo eyaya miquea ebacua cuaya meeje”. Jamaya Eyacuiñajjiya aca poa.

¹⁰ Eyaya, Pabohua miquianaya pea esohui huohuije Isaacaja bacua cuanajo. Jamajjeya miquianaya ba meeje ojjaña Amajamaja osecua cuana Eyacuiñajjiya babacajeyo jjima ojaya epeeji nei epojji. Oe nei babaca ca poa; etiiquiana Isaaca ojaya ebabaca poa. Isaacaja ehuanase Shemeca bajjani poa, oja mejo ebacua becajaa poa, dejja pea'ai. ¹¹ E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pea'ai, Eyacuiñajjiya huohui ca poa oe ebacua ojaya ebabaca'yo ojaya epeeji nei epojji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. ¹² Ba majje pojjeama Eyacuiñajjiya ojaya epeeji epojji babaca cani. Joya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaa jama ba'a: “Mique bacuaa Esao bajjaniya cashajja'ajja cahua oja chahuaja esohui, Jacoboja” Eyacuiñajjiya aca poa Shemeca. ¹³ Eyacuiñajjiya esohui huohuiji yahuajo ojaya esohui tehue mee ca'ya poa jama ba'a: “Ecuea Jacobo quea jea nee nee. Esao ca ca cajaa anaje” Eyacuiñajjiya aca poa.

¹⁴ —¿Apiojji shai Eyacuiñajjiya ebionei cuaya cajaa aca'yonaje, ebacua quiije cuaya babaca ca

poa? ¿Apiojji shai? Jamaya eseyaya ajjima añã. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani. ¹⁵ Ohuaya Moisesi huohui ca poa jama ba'a: “Eya beca cuana nijje quea bei poani. Beca cuana eyaya jaahuanaña. Cua eya quea jea añã eyaya babacaña” Eyacuiñajjiya aca poa. ¹⁶ Eseyaya eba'ejjijo pojjeamajo, esejaya ejjashahuabaquijjijo pojjeamajo pea'ai ese nijje quea bei poani Eyacuiñajji. Chojja, ojaya quea jea nee nee poanijo ohuaya eseya jaahuana cani, ese nijje quea bei poani pea'ai. ¹⁷ Cuanaya yahujajo nei Ejito emeshi mese Panao bajjanijo Eyacuiñajjiya esohui etehue'yo jama poa ba'a:

“Panao, eyaya miya nequi meeaña Ejito emeshi mese epojji. Eyaya ma dejja cuanaja ba jjima añã mi quea mete po meeji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii”.

Jamaya Panao Eyacuiñajjiya aca poa. ¹⁸ E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca chojja, quea bei pojjeama po tiitiani shajjamajojo. Mimishi pajea mee'yo jjima tii tii acani Eyacuiñajjiya.

¹⁹ Jamajjeya beca cuaa huohui'ajja cani jama ba'a: —Eyacuiñajjiya ecuana mimishi pajea meesahua ajja. Jamajjeya ¿apiojji ohuaya tecuea cani ecuana quea mimishi poanijo? Ojaya ejjashahuabaquijji jayojja jama acani ohuaya, de —beca cuana poani.

²⁰ Eyaya miquianaya saja'aña jama ba'a: ¡A'a Eyacuiñajji niñebajji! Miquianajaya Eyacuiñajji emimicuiajejanobiajeajji pojjeama. Jama ba'a: Meshimisi iñacajjiya meshimisi pana majje iñaca cani shajajji acani. ¿A'a meshimisiya tecuea caje meshimisi iñacajji jama ba'a: —¿Apiojji acuaeya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. ²¹ Meshimisi iñacajjiya meshi iña majje ojaya ejjashahuabaquijji jayojja jama acani. E'e pojja'a meshimisi quea bame nee nee asa acani, yiye bame nee nee a sa acani pojja'a. Ojaya ejjashahuabaquijji jayojja jama pana'yome acani. ²² Jamaya Eyacuiñajjiya acani pea'ai, ojaya ejjashahuabaquijji jayojja jama acani. Beca cuana quea mimishi po tiitiianijo, Eyacuiñajjiya oya cuana quea nee nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjeya nei quea tecue nee pocuaji ajja shajjama' nijje. Chojja, quijje nei quea nee nee po mee caje'yo. Ishoa cani. E'e pojja'a shajjama' cuana Jesosaja epeeji poaje ba'ajja'. Jamajjeya Eyacuiñajjiya oya cuana quea nee nee epo meeji pojjeama. ²³ Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. ²⁴ E'e, Eyacuiñajjiya eseya beca cuana, Jodio cuana, Jodio pojjeama cuana pea'ai babaca canaje ojaya epeeji epojji. Ojaya ejjashahuabaquijji jayojja

jama acani, Eyacuiñajjiya. ²⁵ Jamajjeya yahuajo nei ojaya esohui huohuijji Osea bajjani tehue mee ca poa jama ba'a:

“Yahuajo nei Jodio pojjeama ecuea ebabaca pojjeama ecuea epeeji epojji. Jjeya ca ca oya cuana ecuea ebabaca ecuea epeeji epojji. Yahuajo oya cuana ecuea quea jea nee pojjeama. Jjeya ca ca oya cuana ecuea quea jea nee nee poani. ²⁶ Jodio pojjeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeeji pojjeama —poanaje. Jjeya ca ca on-aaya huohui caje jama ba'a: —Miquianaya Eyacuiñajjiya ebacua cuana poanaje”.

Jamaya yahuajo Eyacuiñajjiya tehue mee ca poa.

²⁷ Cuanaya yahuajo nei Eyacuiñajjiya esohui huohuijji Isaiaa esohui tehue ca poa Jodio cuanajo jama ba'a:

“Etiiquiana Isaeni bajjanija osecua cuana quea huiso nee nee poaje. Meshijaji sope huisoajja poaje, sicosico meemee ajja quea huiso nee neejo. Jamatii oe pojji cuanaja mimishi ecuijea'yo poaje. Eyacuiñajjiya oe pojji ba'e tiitii mee caje'yo onijje quea ja'a nee.

²⁸ Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo caje'yo onijje jjapeequi sa po'yo ajjajojo. E'e jojo nei jamaya Eyacuiñajjiya acuaji caje”.

Jamaya aca poa Isaiaa. ²⁹ Ohuaya pea esohui tehue ca poa jama ba'a:

“Yahuajo Eyacuiñajjiya quiyo jeyojeyo mee ca'ya poa ojjaña quea mimijjequijea, ojjaña quea

mimishi Sonoma cuiñajjijo ba'e, ojjaña Comosha cuiñajjijo ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa”.

Jamaya aca poa Isaiaa.

Jodio cuana Jesosa nijje jjapeequi jjima; Eyacuiñajjiya oya cuana ba jjima emimishi cuijea'yo

³⁰ ¡Jamajjeya bacue jiquio! Eyacuiñajjiya quea huiso Jodio pojjeama ba caje mimishi'ama. Jodio cuana ca ca oe pojji ba caje mimishi'ama. Yahuajo Jodio pojjeama cuana jjashahuabaqui jjima poanaje jama ba'a: —¿Achajja shai ecuana ba'eje Eyacuiñajjiya esohui jayojja jama so'o? Jamajjeya ohuaya ecuana ba caje mimishi'ama —jamaya jjashahuabaqui jjima Jodio pojjeama poanaje.

Jamatii Jesosa nijje jjapeequianijo, Eyacuiñajjiya oya cuana ba cani mimishi'ama. ³¹ Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jjashahuaba quehuaquinaje jama ba'a: —Ecuana ojjaña Eyacuiñajjiya esohui cuana jayojja jama atiitiañajo, ohuaya ecuana ba caje mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atiitii cajo. ³² ¿Yajjaje? ¡Bacue! Eyacuiñajjiya Jodio cuana ba cani mimishi'ama ca ca Jesosaja epeejji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuaya esohui etehue'yo jayojja jama atiitiaña. Jamajjeya

Eyacuiñajjiya ecuana mimishi'ama ba caje —oya cuana poa. Chojja de, ajjima ojaya, de.

³³ E'e, yahuajo Isaiaa Eyacuiñajjiya esohui tehue ca'ya poa jama ba'a:

“Eyaya huoojeaje mimishi cuijeajji Isaeni cuana huasijje. Jamatii Isaeni cuana jjashahuaba quehuaquije; mimishi cuijeajji cajaa acaje'yo. Beca cuana onijje jjapeequiajo ca ca quea bihui nee nee poaje'yo”.

Jamaya aca poa Isaiaa Isaeni cuanajo, Jodio cuanajo.

10

¹ Miquianaya Jodio cuana Shomajo ba'e Jesusaja epeeji poanijo ecuea epeeji poani pea'ai. Eya, Pabo Jodio pea'ai. Eya ojjaña Jodio cuanajo mimi tiitiiani Eyacuiñajji nijje jama ba'a: —Eyacuiñajji, jJodio cuana jjapeequi meesahuacue Jesosa nijje! Jamajjeya oya cuana cuaqui yasijje epoqui'yojji pojjeama —jamaya eyaya atiitiaña.

² Ecuea eba ojjaña Jodio cuana Eyacuiñajjiya epeeji po sa poani. Jamatii onajaya ejjashahuabaquijji quea quehua poanijo Eyacuiñajji nijje jjapeequi meemee ajja. ³ Jesosa nijje jjapeequiajo, Eyacuiñajjiya Jodio cuana mimishi'ama ba caje, ma yahuajo shajjama' poa. Jamaya beshahua nei ojjaña Jodio cuanaja eba pojjeama. Jesosa cajaa acanaje. Ojaya ejjashahuabaquijji quea quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba canì mimishi'ama Jesosa nijje jjapeequianijo, quea pame ba'yanijo

pojjeama. ⁴ E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuaba quehuaquiani jama ba'a: —Moisesija etehue'yo jayojja jama atiitiañaajo, Eyacuiñajjiya ecuana ba caje mimishi'ama —jama posoya acani Jodio cuaa.

Eyacuiñajjiya ojjaña mimishi cuijea'yo sa acani

⁵ Yahuajo nei Moisesiya Eyacuiñajjiya esohui tehue ca poa jama ba'a:

“Eyacuiñajjiya eseya ba caje mimishi'ama ojaya esohui atiitiañaajo. Jamajjeya ¡ojaya esohui jayojjaya oe atiitiicue!”

Jamaya esohui tehue ca'ya poa Jodio cuanaja yajji.

⁶ ¡A'a jjashahuaba quehuaquiji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama aña tiitiijo —a'a jamaya jjabaquiji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a:

“A'a jjashahuabaquiji jama ba'a: —E'e pojja'a beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama”.

Jama tehuemeya aca poa Moisesiya.

Jjamajjeya ¡jamaya a'a jjashahuaba quehuaquiji! Jesosa poeyanaje ese que; mano'yonaje Eyacuiñajjiya ese mimishi'ama ebajji. ⁷ Moisesiya pea esohui tehue ca poa jama ba'a:

“iA'a jjashahuaba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!”

Jamaya Moisesiya tehue ca poa.

E'e, jamaya quea jjashahuabaqui quehua. Jesosa shequi o'oyanaje ese mimishi cuijea'yojji epojji. ⁸ Jamajjeya Eyacuiñajjiya Moisesi esohui jama tehue meeme aca poa ba'a:

“Eyacuiñajjiya miqúanaya ba caje mimishi'ama eba'e tiitii'yojji. Quea camaja nee nee pojjeama. Eyacuiñajji miqúanaya mimishi'ama ebajji mimi huicha'a huicha'anaje. Miquianaaya shajja'ajja majamajanaje. Majoya jjashahuabaqui majamajanaje miqúanaya”.

Jamaya aca poa Moisesiya. Maya ecuaaya huohuiaña miqúanajaya eshajja'ajjajji, Jesosa nijje ejjapeequijji. ⁹ E'e jojo nei ejjahuohuiqui jiquio jama ba'a: —Jesosa ecuea Emeshi Mese nei poani —ejja'aqui. E'e jojo nei ejjashahuabaqui jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesosaa eseya ba'e tiitii mee caje'yo eyajo onijje.

¹⁰ Jesosajo e'e jojo nei jjashahuabaquianijo, Eyacuiñajjiya eseya ba caní mimishi'ama. Eseyaya e'e jojo nei huohuiaña: —Eya Jesosaja epeeji.

Jamajjeya Jesosaa eseya onijje ba'e tiitii mee caje'yo. ¹¹ Yahuajo nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjija huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

¹² E'e, Jesosa esejaya Emeshi Mese nei oe nei, ojjañaja; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesusaa eseya jaahuana cani quea pame nee. ¹³ E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, ꞑecuea mimishi cuana cuijea'yocue! —jamaya mimianijo, Jesusaa eseya mimishi cuijea'yo majje ba'e tiitii mee caje'yo eyajo.

¹⁴ Pea cuanaja Jesosa ba jjima, onijje mimi jjima; emimishi cuijea'yojji pojjeama. Shajja'ajja jjima Jesosa mano'yonaje ojjañaja mimishi cuijea'yojji. Jesusaja esohui huohuijji poqui jjima ona huasijje esohui quea pame Jesusajo huohuiya. ¿Acha-
jja shai oya cuana Jesusaja epeeji poaje so'o?

¹⁵ Eyacuiñajjiya ojaya esohui huohuijji pea cuana huasijje huoojea jjimajo, oya cuana Jesusajo eshajja'ajjajji pojjeama. Yahuajo nei Eyacuiñajjija esohui huohuijji Isaiaa esohui tehue ca poa jama ba'a:

“Eyacuiñajjija esohui huohuijji poeyajo esohui quea pame huohuiya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

¹⁶ E'e, Eyacuiñajjija esohui huohuijji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa yahuajo

nei esohui tehue ca poa Isaeni cuanajo jama ba'a: “Emeshi mese, oe pojji Isaeni cuaa ecuanajaya esohui shajja'ajja canaje” jamaya Isaiaa aca poa.

¹⁷ Eyacuiñajjiya ojaya esohui huohuijji huoojea cani esohui quea pame nee Jesusajo huohuiya. Jamajjeya ma esohui quea pame nee shajja'ajja majje Jesosa nijje jjapeequije'yo. ¹⁸ Jamatii beca cuana jjashahuabaquiani jama ba'a: —E'e pojja'a Isaeni cuanaja shajja'ajja jjima esohui quea pame Jesusajo. Jamajjeya Jesosa nijje jjapeequi jjima poanaje.

Chojja. Shajja'ajja canaje. Jamatii shajjama' jay-ojja poanaje. Yahuajo Eyacuiñajjiya esohui quea pame Jesusajo tehue mee ca poa jama ba'a:

“Ojjaña meshijo ba'e yasijje Eyacuiñajjiya esohui huohuijji cuana esohui quea pame huohui mee canaje”.

Jamaya yahuajo nei aca poa Dabiya.

¹⁹ Beca cuana jjashahuaba quehuaquiani jama ba'a: —E'e pojja'a Isaeni cuanaja Eyacuiñajjija esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajjija esohui tehue ca poa jama ba'a:

“Isaeni cuana, miquianaya ebionei ecuea ehabaca coo, eyaya babaca coonaje ecuea epeejji epojji. Miquiaaya ca mo ca oe cajaa anaje. Jamatii eyaya pea cuana babacaje'yo ecuea epeejji nei epojji. Jamajjeya miquianaya quea quene poaje ona nijje, Isaeni pojjeama cuana nijje. Jjashahuabaquije jama ba'a:

—Isaeni pojjeama cuana quea pame pojjeama. Ecuana ca ca quea pame nee. Eyacuiñajji e'e jojo nei onajaya ba jjima. Ecuana jaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa — jamaya miqianaya poaje”.

Jamaya Moisesiya aca poa Isaeni cuana. ²⁰ Majoya Isaiaa Eyacuiñajjiya esohui quea ja'a nee tehue ca poa jama ba'a:

“Pea cuanaja eya ba jjima. Eyaya oya cuana jjapeequi meesahuaje'yo enijje. Oya cuana mimi jjima enijje ojaya mimishi cuijea'yojji. Jamatii oya cuana ecuea esohui ba meesahuaje'yo”.

Jamaya Isaia tehue mee ca poa yahuajo nei nei. ²¹ Eyacuiñajjiya Isaia pea esohui tehue mee ca poa Isaeni cuanaja jama ba'a:

“Eyaya Isaeni cuana iyaa majamajanaje enijje ej-japeequijji. Jamatii ecuea esohui etehue'yo jayojja jama a sa po'yo ajja tii tii. Shajjama' ojjaña cuana, quea mimishi nee nee”.

Jama tecueameya Isaiaa Isaeni cuana aca poa.

11

Eyacuiñajjiya Jodio cuana cajaa ajjima

¹ Beca Jodio cuana jjashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjeya Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea

etiiquiana poa. Bejami Amajamaja osecua. Eya Bejamija osecua. ² E'e, Eyacuiñajjiya Jodio cuana babaca coo ca poa ojaya epeeji epojji. Yahuajo nei Eyacuiñajjiya esohui huohuiji Enia bajjanija esohui etehue'yo miquianajaya eba. Enia Jodio cuanajo quea quene mimia poa Eyacuiñajji nijje jama ba'a:

³ “Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuiajea ca'yonaje miquea esohui huohuiji cuana. Mei e'iya ani ñajaeoqueajea ca'yonaje, ma aquiana dahuajji acani cuaa mi quea bei ecuana nijje epojji ñajaeoqueajea ca'yonaje. Eya ee nei yani miquea epeeji. Eya cuiajea sa acani pea'ai Isaeni cuaa”.

Jamaya aca poa Eniaa.

⁴ Eyacuiñajjiya Enia saja'a ca poa jama ba'a: “Chojja. Quea huiso nee nee Isaeni cuana ecuea epeeji yani. E'e, 7.000 huisome Isaeni cuana eyacuiñajji nisho Baani bajjani bihuijji pojjeama. Quea huiso Isaeni cuana ecuea esohui jayojja jama ba'yani”.

Jama saja'ameya Eyacuiñajjiya aca poa Enia.

⁵ Jjeya nei cuanaya beca Jodio cuaa Eyacuiñajjiya esohui jayojja jama acani. Eyacuiñajjiya oya cuana babaca canaje ojaya epeeji epojji. Oja mimishijo jjashahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. ⁶ E'e, Eyacuiñajjiya Jodio cuana quea jea nee acanijo oya cuana babaca canaje ojaya epeeji epojji. Quea bei Jodio cuana nijje poanaje. Onaja mimishi cuanajo jjashahuaba tiitiiqui ajja. Jodio cuana ojaya quea

jea nee poanajejo babaca ca'ya poa. Babaca'yo jjima ojaya esohui jayojja jama atiitii canajejojo.

⁷ E'e, beca Jodio cuana Eyacuiñajjija epeeji po-jjeama poanaje. Quea huiso Eyacuiñajjija esohui jayojja jama anisho canaje. Jamajjeya Eyacuiñajjiya oya cuana ba canaje quea mimishi. E'e, Eyacuiñajjiya Jodio cuana babaca canaje ojaya epeeji epojji. Beca cuana e'e nei poanaje. Jamatii pea cuana quea mimishi nee nee poanaje.

⁸ Yahuaajo nei nei Moisesiya Eyacuiñajjija esohui tehue ca poa jama ba'a:

“Jamajjeya Eyacuiñajjija shajjama' cuana quea jjashahuabaqui ja'a epo meeji pojjeama. Eyacuiñajjija etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pea'ai. E'e, jamaya Isaeni cuana jjeya pea'ai shajjama' po tiitiani”.

Jamaya Moisesiya tehue ca poa.

⁹ Yahuaajo nei nei emeshi meseya Dabiya Jodio shajjama' cuana tecuea ca poa jama ba'a:

“Esejaya etiiquianaja esohui jayojja jama atiitiiña miquianaaya. Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya miquianaya quea nee nee capo mee cahua. ¹⁰ Cojjamaja ejiojji ba jjima jayojja jama miquianajaya ba jjima capoahua tii tii Eyacuiñajjija ejjashahuabaqui'yojji. Cuanaya aquiana quea biquie abo tiitii cani jayojja jama capoahua miquianajaya mimishi; epajea'yojji pojjeama tii tii capoahua”.

Jamaya Dabiya tehue ca poa yahuajo nei nei Jodio cuanajo.

Eyacuiñajjiya Jodio cuana iyaa cani tii ojaya epeeji epojji

¹¹ E'e pojja'a beca cuana jama jjashahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajji jjashahuabaquiani jama ba'a: —E'e, Jodio pojjeama cuana Jesosa nijje jjapeequi meesahuaña ba majje e'e pojja'a Jodio cuana Jesosa nijje jjapeequije'yo pea'ai enijje eba'e tiitii'yojji —jamaya Eyacuiñajji jjashahuabaquiani.

¹² Jodio cuana aje oe jjashajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana Jesosa nijje jjapeequi jjima jojoya. Jodio cuana Jesosa nijje jjapee neineiQUIAJJO ca ca Eyacuiñajjiya quea pame nee nee acaje'yo ojjaña.

¹³ Jodio pojjeama cuana Shomajo ba'e, Eyacuiñajjiya eya huoojea canaje miQUIANA que ojaya esohui huohuiya. Eyaya esohui huohuiña tii tii miQUIANAYA Jesosaja epeeji epo meesahua-
jji. ¹⁴ Jamajjeya ma ba majjeya Jodio cuana pojja'a Jesosaja epeeji po sa poaje'yo pea'ai. ¹⁵ E'e, Jodio

cuaa Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quiijje Jodio cuana Jesosa nijje jjapeequi meesahua caje'yo pea'ai. E'e, jjeya Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. ¹⁶ E'e, jjeya oe pojji Jodio cuana Jesusaja epeeji nei poani. Jamajjeya quiijje Eyacuiñajjiya quea huiso Jodio cuana ojaya epeeji nei po mee caje'yo. Jama ba'a: Acui esajja quea pame nee nee poajo, quiijje tii majje ejajja quea pame nee poaje pea'ai. Oya jayojjaya Amajama Eyacuiñajjija ehabaca poa. Jamajjeya oja osecua cuana Eyacuiñajjija ehabaca poaje pea'ai.

¹⁷ Jjashahuabaquicue jama ba'a: E'acui meseya acui aa enojinoji cobojea majje ejee cojjajji iyanobia cani eti'yoyji. Acui sajja quea pamejo pea acui jee cojjajji e'iyandobia pohuaj'e'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesusaja epeeji cuana poaje. Jiquio ecua ecuciojjone sajjajji jayojja eseya quea pame ba'e mee cani. ¹⁸ Jamajjeya Jodio pojjeama cuana, ja'a jjashahuabaquijji miqianaya quea pame nee, Jodio cuana quea pame pishana! Chojja. Eyacuiñajji miqianajaya eba poanaje Jodioja ehuohuijo. Miqianajaya ehuohuijo pojjeama ca ca Eyacuiñajji Jodio cuanaja eba poa.

¹⁹ E'e pojja'a miqianaya jjashahuabaquiani jama ba'a: —Jesosa cajaa aca poajo Jodio cuana acui aa ecobojea'yo jayojja jama poanaje. Esey,

Jodio pojjeama ca ca Jesosaja epeeji poanijo ecuicojjonejo pea ecojja posho e'iyانبيا'yo quea pame pohua'yani jayojja jama —miquianaya poani.

²⁰ E'e, jamaya poanaje. Jesosa cajaa amajje Jodio cuana acui aa ecobojea'yo jayojja jama poanaje. Eyacuiñajjiya oya cuana cajaa aca poa. Miquianaya ca ca oe Jesosa nijje jjapeequi'yajo, Eyacuiñajjiya ba cani mimishi'ama. E'e, jjeya Eyacuiñajjiya miquianaya babaca canaje. Jamatii ja'a jjashahuabaquiiji miquianaya quea pame nee Jodio cuana quea pame pishana! Chojja. ¡Miquianaya quea ja'a nee Jesosa nijje jjapee tiitiqicue!
²¹ ¡Bacue oe! Eyacuiñajjiya Jodio cuana babaca coo ca poa ojaya epeeji epojji. Majoya Jodio cuana jjashajja'ajjaqui sa po ajjajo, ohuaya miquianaya babaca canaje, Jodio pojjeama cuana. Jiquio ecua acui aa nojinoji jehuissejjajea'yo majje eyacua iyanobia ca'yani jama jayojja Eyacuiñajjiya Jodio shajjama' cuana cajaa ajea'yo majje miquianaya babaca canaje. Jamajjeya ja'a shajjama' pojji! Eyacuiñajjiya miquianaya cajaa aca chana'. ²² E'e, Eyacuiñajjiya ojjaña quea jea nee nee acani. Shajjama' cuana ca ca tecuea neinei caje'yo, de. E'e, ojjaña joya shajjama' poani ohuaya quea nee nee po mee caje'yo. Miquianaya ca ca ohuaya quea pame nee nee acani ojaya quea jea nee neejojjo. Ohuaya miquianaya quea jea nee acaje'yo tii tii, ca jjashajja'ajja tiitiquiajo. Shajjama' poajo ca ca ohuaya miquianaya quea nee nee po mee caje'yo pea'ai, de. ²³ E'e, Jodio cuana pea'ai Jesosa nijje jjapeequiajo Eyacuiñajjiya ojaya epeeji nei po mee caje o'oya, yahuaajo nei nei jayojjaya. E'e

nei, jiquio ecua acui aa ejehuissejjajea'yo iyanobia ca o'oyani jama jayojja Eyacuiñajjiya oya cuana acaje'yo; ojaya epeeji nei po mee caje o'oya. ²⁴Miquianaya ca ca Jodio pojjeama cuana yahuajo nei Eyacuiñajjiya ebabaca pojjeama poa. Jamajjeya miquianaya pea acui aa jayojja, ebiojo nequi acui aa jayojja. Jamatii jiquio ecua ebiojo nequi acui aa acui bame bame yasijje iyanobia cani jayojja jama Eyacuiñajjiya miquianaya babaca canaje ojaya epeeji nei epojji. Jamajjeya Eyacuiñajjiya miquianaya acanaje jayojja jama ohuaya Jodio cuana acaje'yo. E'e, ecuea etiiquiana Eyacuiñajjiya babaca coo ca poa. Jamajjeya jiquio ecua acui ebana'yo acui aa ejehuissejjajea'yo oya tii acuijo iyanobia caje o'oya jayojja jama Eyacuiñajjiya Jodio cuana acaje'yo. Jesosa nijje jjapeequiajo Eyacuiñajjiya huohui caje jama ba'a: —E'e Jodio cuana, jjeya miquianaya ecuea epeeji nei po o'oyanaje, ojjaña —acaje Eyacuiñajjiya.

Jodio cuana Jesosaja epeeji quiije poaje'yo

²⁵ Ecuea epeeji cuana, eyaya miya huohuije ma Eyacuiñajjiya quiije acaje Jodio cuanajo, ma yahuajo ojjañaja ba jjima poa. Jamajjeya ecuea esohui ba majje miquianaya ejjashahuabaquiiji pojjeama jama ba'a: —Ecuana ya nei ca ca oe Eyacuiñajjiya ebabaca ojaya epeeji nei epojji —a'a oe miquianaya pojji.

Chojja. Jjeya Jodio cuaa Emeshi Mese nei Jesosa cajaa acani beshahua nei ojjaña. Jamaya epo'yojji tii pojjeama. ¿Ache Jodio pojjeama cuana Jesosaja epeeji poaje? Eyacuiñajjiya eba. Mahuiso jjapeequiajo, Jodio cuana jjapeequije o'oya Jesosa

nijje. ²⁶ Jamajjeya quea huiso nee nee Jodio cuana eyajo ba'e tiitii mee caje'yo Jesosa nijje jjapeequiajo. E'e, yahuajo nei Eyacuiñajjiya Isaia tehue mee ca poa Isaeni cuanajo, ma Jacoboja osecua cuanajo jama ba'a:

“Eyacuiñajjija huoojea'yo ojjaña jaahuanajji poeje. Oya Jodio dejja poaje. Oya Jacoboja osecua cuana mimishi pajea meesahua'yojji poaje'yo. ²⁷ Ma ecua eyaya Jodio etiiquiana huohuinaje jamaya eyaya aje'yo; ojjañaja mimishi cuijea neinei'e'yo”.

Jamaya yahuajo nei nei Eyacuiñajjiya aca poa.

²⁸ Jamatii jjeya Eyacuiñajjiya Jodio cuana ba cani ojaya epeeji pojjeama Jesosa cajaa ajji poajo. Jamajjeya Jodio cuana ma esohui cajaa acajo, Eyacuiñajjiya esohui quea pame nee Jesosajo miqúanaya shajja'ajja mee canaje, Jodio pojjeama cuana. Jamatii Eyacuiñajjiya Jodio cuana cajaa tiitii ajjima, de. Yahuajo nei ecua oja ebaaca poa. Ohuaya ecuanaja etiiquiana huohui ca poa jama ba'a: “Miya, miquea osecua cuana pea'ai ecuea epeeji nei cuana poaje'yo tii tii” jamaya ohuaya Amajama, Jacobo, Isaaca pea'ai huohui ca poa. ²⁹ E'e jojo nei Eyacuiñajjiya ojaya esohui jayojja jama acaje'yo, epajea'yojji pojjeama tii tii. Babaca'yo majje cajaa ya'yojji pojjeama tii. ³⁰ Jamajjeya jjeya Jodio cuana Jesosa nijje jjapeequi sa po'yo ajja jojoya Eyacuiñajjiya miqúanaya, Jodio pojjeama cuana quea bei nee acani. Miquánaja mimishijo jjashahuaba tiitiqui ajja, jamatii yahuajo shajjama' nei poa. ³¹ Eyacuiñajjiya quijje Jodio cuana jama acaje'yo ba'a: Jjeya ohuaya miqúanaya quea bei acani;

miquea mimishijo jjashahuabaqui ajja. Oya jay-
ojjaya quijje ohuaya Jodio cuana acaje'yo, ja-
matii jjeya shajjama' nei poani. ³² Jamajjeya Ey-
acuiñajjiya ojjaña cuana ba cani shajjama' nei nei.
Jesosa nijje jjapeequiajo ca ca ojjañaja mimishijo
jjashahuaba tiitiqui ajja poaje. Quea bei ojjaña
cuana nijje poaje'yo Eyacuiñajji.

Eyacuiñajji bihuia cani Pabohua

³³ Quea pame nee nee Eyacuiñajjiya eseya acani.
Ojjaña eseya ojaya eba nei nei; oya esejaya
mimishi cuijea'yojji. E'e jojo nei ojjaña ojaya eba
nei nei. Quea ja'a nee nee ojaya ejjashahuabaqui-
jji. Quea pame nee nee ohuaya acani ojjaña.
³⁴ Yahuajo nei Eyacuiñajjiya Isaia tehue mee ca poa
jama ba'a:

“¿Ajea eba nei nei Eyacuiñajjiya ejjashahuabaqui-
jji? ¿A'ya shai o ba meesahuajji? Chama' nei
nei. Oya oe nei quea jjashahuabaqui ja'a
nee nee. ³⁵ ¿Aya acuae jja mi oe che quia
cani aquiana Eyacuiñajjiya? Ojjaña aquiana
cuana ojaya, de”.

Jamaya Eyacuiñajjiya esohui Isaiaa yahuajo nei
tehue ca poa.

³⁶ E'e, Eyacuiñajjiya ojjaña aquiana pana ca'ya
poa. Ojjaña ojaya aquiana. Quea sohui poja nee
neeya jjejojo ohuaya ojjaña quea pame amee cani.
Jamajjeya ojjaña ba cani oya quea ja'a nee, quea
pame nee nee pea'ai: —Eyacuiñajji, miya quea
pame nee. Pea chama' mi jayojjaya —jamaya ¡oya
ejjabihuia tiitiqui! ¡Jamaya ejja'aqui!

12

¡Jesosaja epeeji poanijo ojaya esohui jayojja acue!

¹ Jamajjeya ecuea epeeji cuana, ¡shajja'ajjacue mo! Eyacuiñajji ese nijje quea bei poani, mimishijo jjashahuaba tiitiqui ajja. Jamajjeya ¡ojaya epeeji nei nei ba'ecue! ¡Eyacuiñajji bihuiacue jama ba'a: —Eyacuiñajji, eya miquea nei nei. Miquea ejjashahuabaqui'yojji jayojja jama eyaya aje'yo —jamaya pocue! E'e, ¡Jesosa jayojja jama ba'e tiitiicue quea pame nee! Eyacuiñajji bihuiacue jama ba'a: —Eyacuiñajji, miya quea pame nee nee.

² ¡A'a Eyacuiñajjiya epeeji pojjeama jayojja pojji! ¡Eyacuiñajjiya eseya ojaya esohui jayojja jama capo mee cahua! Cajjashahuabaqui mee cahua o jayojja. Majoya ojaya ejjashahuabaquiiji eseya ba mee caje'yo. Ma ese ohua amee caje'yo ojo ohuaya eseya ba mee caje'yo. Ojaya ejjashahuabaquiiji quea pame nee nee, quea ja'a nee nee enequi tiitiijji pea'ai.

³ Eyacuiñajjiya eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajjiya eseya ba'e meesahua cani ojaya epeeji epojji. Jamajjeya ¡a'a jjashahuabaquiiji jama ba'a: —Eya quea pame nee nee —a'a jamaya pojji! Chojja, ¡quea bei nee jjashahuabaquicue! ¡Jama acue ba'a: —Eyacuiñajjiya eya chaco meesahua cani jayojja jama eyaya onijje chacoje —jamaya pocue!

⁴ ¡Bacue! Eseyaya eyami oe. Jamatii eseyaya eyamijo yani eme', ejiojji, ecojja, equise pea'ai. Eme' ca ca ecojja jama pojjeama; pea. Jamatii

ojee chaco cani oe eyamiya. ⁵ Oya jayojjaya eseya Jesosaja epeeji cuana quea huiso nee. Oe epeeji pea jayojja chaco chaco ajja. Jamatii eseyaya ojee chacoaña Jesosa nijje. ⁶ Jesosa nijje jjapeequianijo, Eyacuiñajjiya eseya chaco meesahua cani quea pame ojaya echacojjijo. E'e, ohuaya beca cuana chaco meesahua cani oe echacojjijo. Pea epeeji chaco meesahua cani pea echacojjijo, de. Jamajjeya ¡ohuaya chaco mee cani jayojja jama ejja'aqui! Jamajjeya ¡quea ja'a nee ejja-sohuihuohuiqui, ohua huohui mee cani jayojja jama ejja'aqui! ⁷ Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesosaja epeeji sohui bameeji ohuaya po mee canijo, ¡ojjaña esohui caba meesahua cahua, huea'ama capoahua! ⁸ Ona jjabahuejjaquijji po mee canijo, pea epeeji cajjabahuejjaqui mee cahua quea ja'a nee: —Eyacuiñajjiya miya quea bihui po mee caje mimishi'ama ba'yanijo —cahuohui cahua cuana.

Eyacuiñajjiya Jesosaja epeeji beca cuana quea aqui ana huiso po meesahua cani pea'ai. Jamajjeya quea bihui nee capoahua, nishelui'ama, de jja tai'ama. Beca cuana pea epeeji jaahuanajji po mee cani. Jamajjeya e'e jojo nei quea ja'a nee nee cajjashahuabaquiahua. Pea epeeji ca ca aema' cuana, emanoojaa cuana jaahuanajji po mee cani. Jamajjeya quea jea nee cajaanuana cahua Jesosaja epeeji cuana.

¡Jesosaja epeejiya pea epeeji cuana quea jea nee acue!

9 ¡E'e jojo nei ojjaña cuana quea jea nee nee acue! Jamajjeya ja'a pea cuana quea tai ajji! Chojja, ¡ojjaña cuana quea pame nee nee acue! 10 E'e, ¡ojjaña Jesusaja epeeji quea jea nee acue! ¡Miquea huapa pojjeama jayojja jama quea jea nee neeya acue! 11 Jamajjeya ¡quea ja'a chacocue huea'ama! ¡Jesusajo, Emeshi Mese neijo quea bihui nee acue ojaya yajji! 12 Eyacuiñajji esohui ese nijje jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ja'a oe Jesosa pajea'yojji quea yeno po majje! ¡Eyacuiñajji nijje mimi tiitiicue jama ba'a: —Eyacuiñajji, ¡eya jaahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

13 ¡Jesusaja epeeji aema' poanijo eba'e meesahuajji quiacue! Pea cuana miquea cuiñajji nequiñaqui'yajo, ¡iyaacue bobi ijiajji, ecahuijji pea'ai! 14 Jesusaja epeeji, dejja mimishiya miya mimia cajje ja'a panajajji! ¡Eyacuiñajji nijje mimicue jama ba'a: —Ecue Chii, ¡e cuiajji epo mique Bacua Ejja Jesosa nijje jjapeequi meesahuacue! —acue!

15 ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama tii tii po meecue! 16 ¡Mi jayojjaya Jesusaja epeeji cuana quea pame nee ba'e meesahuacue! ¡A'a jama jjashahuabaquijji ba'a: —Onajaya aquiana quea pame nee nee. Eya o jayojjaya poaje —a'a jama jjashahuabaquimeya pojji!

¡Aema' cuana a'a cajaa ajji! Chojja. ¡Jjapeequicue onijje! ¡A'a jjashahuabaquijji miya quea pame nee

nee, pea cuana quea pame pishana! ¹⁷ Onaa miya quea mimishi acajje ja'a onijje quea mimishi pojji! ¡Quea pame nee po tiitiicue ojjaña ebañaja ebajji miya e'e jojo nei Jesosaja epeeji poani! ¹⁸ Quea camaja eba'eji pojja'a. Jamatii ¡ojjaña nijje quea bei nee ba'ecue! ¹⁹ Onaa napa cajje ja'a jjashahuabaquijji jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajjiya esohui etehue'yo poa ba'a:

“Ecuea epeeji napajji poani eyaya eyaye nei sosequiaje'yo; quea nee nee po meeje'yo. Eyaya, Emeshi Mese neiya jamaya huohuiaña”.

Yahuajo nei jamaya Eyacuiñajjiya tehue mee ca poa. ²⁰ Pea tehue mee ca poa jama ba'a:

“Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya ajje oya quea bicho nee nee poaje. Miya napa pajea caje'yo pojja'a, miquea epeeji poaje”.

Jamaya yahuajo tehue ca poa Eyacuiñajjiya esohui.

²¹ ¡A'a jjashahuabaquijji jama ba'a: —Ojjaña joya ecuana nijje quea mimishi poani eya o jayojjaya poaje pea'ai, de —a'a jamaya pojji!

Chojja. Miya napa cajje ¡jamatii oya cuana quea pame nee acue!

13

Jesosaja epeeji cuaa emeshi mese cuana cashajja'ajja cahua

¹ Emeshi meseya huoojea canijo, ¡jjashajja'ajjaquicue! Emeshi mese cuana Eyacuiñajjiya

huoojea canaje ojjaña cuana quea ja'a ba'e meesahuaa. Jamajjeya emeshi mese cuana Eyacuiñajjiya quea ca'a po mee cani ese huoojeajji.

² Jamajjeya jjashajja'ajjaqui ajjajo ca mi ca oe Eyacuiñajjiya miqúanaya ba cani shajjama' ojaya ehoojea'yoja esohui shajja'ajja sa po ajjajo. Shajjama' cuana aje oe quea nee po mee caje'yo.

³ Eyacuiñajjiya emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuanajo mete'ama ba'e sa poani? ¡Quea pame acue, ojaya esohui jayojja! Jamajjeya oya minijje quea bihui nee poaje pojja'a: —E'e, ¡jamaya quea pame nee acue! —oya poaje.

⁴ E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya jjabahuejjaqui mee caje. Jamaya Eyacuiñajjiya oya cuana huoojea cani shajjama' cuana jjabahuejjaqui meeji. ⁵ Jamajjeya ¡emeshi mese cuana shajja'ajjacue mete'ama eba'ejji, Jesosaja epeejji quea pame nee epojji pea'ai!

⁶ ¡Jamaya pea'ai oya cuana sosequiacue! Ojjaña quea pame ba'e mee cani sosejje emeshi mese sosequia cani cuaa, Eyacuiñajjiya huoojea.

⁷ Jamajjeya: —¡Sosequiacue mo! —ohua acajje ¡jamaya quiacue emeshi meseja eba'e meeji ohua chaco cani sosejje, mahuiso tiya! ¡Miya jaahuana canijo, miquea meshi cuiña canijo pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a: —Emeshi mese, miya

quea pame nee ecuana ba'e meesahuaña —acue!
Jamaya quea pame nee.

*¡Jesosaja epeeji cuana quea jea acue; pea cuana
nijje quea bei pocue!*

⁸ Jamajjeya ¡aquiana jjeshe majje sosequiacue!
E'e, ¡miyaya yahuajo huohui'yonaje jayojjaya sose-
quiacue! Eyacuiñajjiya eseya quea jea nee nee
acani. Jamajjeya ¡pea cuana quea jea nee acue,
ojjaña! Pea cuana quea jea nee añajo Eyacuiñajjiya
esohui jayojja aña. ⁹ E'e, Eyacuiñajjiya esohui Moi-
sesiya tehue ca poa jama ba'a:

“¡A'a onajaya ehuanase jea bajji! ¡A'a pea quecua-
jji! ¡A'a sii pojji! ¡A'a onajaya aquiana jea
bajji!”

Quijje Eyacuiñajjiya huohui canaje jama ba'a:

“¡Minijje ba'e quea jea nee acue! ¡Miya quea pame
ba'yani jayojja jama ba'e meesahuacue!”

Jamajjeya ¡pea cuana quea jea nee añajo ba'e
meesahuacue! ¡Ojjaña Eyacuiñajjiya esohui jayoj-
jaya jama acue! ¹⁰ E'e, onaya miquea quea jea nee
poanijo oya cuana quea yeno, quea nee po mee sa
po'yo ajja. Jamajjeya onaya quea jea nee poanijo
ojjaña Eyacuiñajjiya esohui jayojjaya aña.

¹¹ E'e, ¡jamaya Eyacuiñajjiya esohui jayojja jama
acue! ¡Bacue ¡iquio! Jesosa esejaya Emeshi Mese
nei jjeya nei pojja'a poeje o'oya. Jamajjeya ¡quea
ja'a nee ba'ecue Eyacuiñajjiya esohui jayojja! ¡A'a
quea huea pojji! ¡Ojaya esohui bacue! Yahuajo
pishana eseya Jesosaja epeeji poanaje. Ohuaya

esejaya mimishi cuijea ca'yonaje. Poe o'oya majje eseya ba'e tiitii mee caje'yo eyajo onijje, Jesusaa. ¹² Jjeya eseya jiquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. Jjapojjaqui majje ja'a'aja'a'a poani jayojja poaje. Jamajjeya ja'a quea mimishi pojji! ¡Pea jjashahuabaquime po'yocue! ¡Jesusaa eseya ba'e meesahua canijo, ojjaña mimishi pajea neinei'yocue! ¹³ E'e, ¡quea ja'a nee nee ba'ecue bicho'ama epojji onaa ba canijo! Jamajjeya ja'a huojji! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ja'a onaja yahue, shacuima' nequi cuana pea'ai siijji! ¡A'a quea mimishi ba'ejji! ¡A'a quea quene pojji! ¡A'a jjamimicuiajea nobiajeaquijji pea'ai! ¹⁴ Chojja. ¡Jesosa nijje mimicue ojaya ejjashahuabaquijji jayojja jama eba'e meesahuajji! Jamajjeya miquea ejjashahuabaquijji yahuajo nei jayojja jama eshahuaja miya eba'e mee'yojji pojjeama.

14

¡A'a Jesusaja epeeji cuana nijje mimijajiji!

¹ Jesusaja epeeji cuana, miquianaaya pojja'a Eyacuiñajjija esohui quea ja'a nee baña. Jesusaja epeeji beca cuana ca ca quea jjashahuabaqui ja'a pishana. ¡Jamatii onijje jjapeequicue quea bei! ¡A'a mimicuiajea nobiajeajji ojaya esohui quea quehuajo! ² E'e, miquianaya beca cuana jjashahuabaquiani jama ba'a: —Ojjaña noe cuana

ca'ijjiahua, jamatii onaaya ba'ehuana canaje ecuiquiaja e'ijjiajji nisho. Ecuaya ijia'yajo Eyacuiñajji ecuaa niije quea quene pojjeama poaje —jamaya beca cuana poani. Jamajjeya noe ijiaña, ojiaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijjia'yojji nisho ba'ehuana canaje a'a ijiajji! Ma eseya ijiajo Eyacuiñajji quea quene poaje ese niije —jama posoya acani. Jama-jjeya acuijjajja cuana, bobi ebana'yo pea'ai ijia cani; noe ijia'yo jjima acani quea meteya jjejojo.

³ Noe ijiajji cuana, ¡a'a jama pojji pea cuana niije ba'a: —¿Apiojji acuae miqianaaya acuijjajja, ebana'yo oopana ijiaña, noe ijia ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijia ajja cuana, ¡a'a pea cuana niije jama pojji ba'a: —Miqianaaya aje oe noe ijiaña. ¿Apiojji? Eyacuiñajji quea quene po chana', de —a'a jamaya ajji!

¡Bacue! Eyacuiñajjiya noe ijiajji cuana pea'ai ojaya bacua cuana po mee canaje. Jamajjeya ¡a'a jamaya pea cuana niije mimijji! ⁴ E'e, miqianaya noe ijia ajja jjejojo mimimimiani. Eyaya miqianaya huohuiaña jama ba'a: Eyacuiñajji ona huoojeajji poani, miqianaya pojjeama. Jamajjeya ¡a'a mimijajijji! Eyacuiñajji ona huoojeajji poanijo ohuaya ohuaye nei jama acaje ba'a: —E'e, miqianaya quea pame nee ba'yani —Eyacuiñajjiya acaje.

Quea ja'a ba'e ajjajo ca ca: —Chojja, ¡a'a jamaya ajji! Quea tai —Eyacuiñajjiya acaje. Eyacuiñajji ese huoojeajji quea ca'a poanijo, ohuaya eseya quea

ca'a po mee cani ojaya ejjashahuabaquijji jayojja jama eba'ejji.

⁵ Cuanaya beca cuana jama poani ba'a: —Beca epojja cuana Eyacuiñajji bihuiajji. ¡Ma epojja cuanajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajji bihuiacue ojjaña pojajajo! —oya cuana poani.

Jamajjeya ¡a'a pea nijje mimijji ache epojjajo chaco cajji! ¡Miquea ejjashahuabaqui'yojji epojja cuanajo jayojja jama acue! Pea cuana ojaya ejjashahuabaquijji jayojja jama ca'a cahua pea'ai epojja cuanajo. ⁶ E'e, Emeshi Mese neija esohui jayojja jama ba'e sa poani miqianaya, ojjaña. Beca cuana quea huiso epojja cuanajo chaco chaco ajja Eyacuiñajji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijji ajji cuaa esejaya Emeshi Mese nei bihuia cani. Ijjia'ijjia jjimahua Eyacuiñajji nijje mimiani jama ba'a: —Eyacuiñajji, ecue Chii ai, eyaya miya bihuiaña noejo.

Noe ijjia pojima' cuaa esejaya Emeshi Mese nei bihuia cani pea'ai jama ba'a: —Eyacuiñajji, ecue Chii ai, eyaya miya bihuiaña jiquio bobijo, acuijjajajo, eso' cuanajo, ebano'yojo cuanaya. E'e, miyaya ojjaña tii meesahua'yonaje —jamaya acani ohuaya.

⁷ Jamajjeya ¡a'a esejaya eba'ejjijo, eseya sañajo jjashahuaba tiitiquijji! Eseyaya eshe nequijo ca ca Jesusaja esohui jayojja jama caba'yahua. Mano'yajo pea'ai eseya Jesusaa jaahuana caje'yo. Eseyaya ojaya tii poaje'yo. ⁸ E'e, eshe nequiya eseyaya Emeshi Mese nei Jesusaja esohui

jayojja aña. Mano'yo majje onijje ba'e tiitiije'yo. Jamajjeya eshe nequi, mano'yajo pea'ai ohuaya eseya jaahuana cani; ese huoojeajji poani tii tii oya. ⁹ Jesosa mano'yo majje shequi o'oyanaje ese jaahuanajji epojji. Jamajjeya ese eshe nequi, mano'yajo pea'ai oya, Jesosa esejaya Emeshi Mese nei poani tii tii. ¹⁰ Jesosaja epeeji poani ojjaña eseya. Jamajoya ¿apiojji acuaeya Jesosaja epeeji quea ja'a nee nijje jjamimicuiajea nobiajeaquiani so'o? Cuanaya epeeji quea ja'a nee poaniya, ¿apiojji miquianaaya Jesosaja epeeji cuana niñebaña so'o? Oya Jesosaja epeeji pea'ai. ¡A'a pajea'yojji quijje eseya ojjaña nequije Eyacuiñajji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añajo ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajjiya.

¹¹ Eyacuiñajjiya esohui etehue'yo jama poani ba'a:

“Eya Eyacuiñajji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequioque majje eya bihuia caje jama ba'a: —Miyaya ca ca oe Eyacuiñajji quea ca'a nee, quea pame nee enequi tii tii —ojjaña poaje”.

Jamaya esohui etehue'yo poani. ¹² Jamajjeya e'e jojo nei o cojja nei nequijajo, Eyacuiñajjiya eseya ojjaña huohui'ajja caje esejaya eba'e'yojjiyo. Quea ja'a ba'enajeya eseyaya oya saja'aje'yo quea bihui. Quea ja'a pojjeama ba'enajeya ca ca quea mete saja'aje'yo.

¡Ona quea mimishi po meeji a'a poji!

¹³ E'e, Eyacuiñajji quea pame nee chacoañajo ¡ojaya pea epeeji cuana a'a niñebajji! Chojja, ¡jama acue ba'a: —Jesosaja epeeji quea ¡jashahuabaqui ja'a po ¡jima ecuea eba'eji ba majje quea mimishi po chana'. Jamajjeya eyaya maya e'amajji po-jjeama oya quea mimishi, quea mete nee epo meeji pojjeama —jamaya pocue!

¹⁴ Esejaya Emeshi Mese neiya eya ba meesahua canaje jama ba'a: Noe ma onaja ba'ehuanacuiqui quea e'ijji nisho eseya ¡jiajo, Eyacuiñajji ese nijje quea quene pojjeama poani. Pea bobi eseya ¡jiajo, jamaya pea'ai poani. Jamatii Jesosaja epeeji beca cuana quea ¡jashahuabaqui ja'a pishana jama poani ba'a: —Ma noe, bobi pea'ai eseya ¡jiajo, Eyacuiñajji quea quene poaje ese nijje —jama posoya acanijo, ohuaya maya ¡jia ¡jima ca'a cahua. E'e, jamaya ¡jashahuabaquianijo ¡jia majje oya quea mimishi poani.

¹⁵ Miquianaya, noe ¡jiajji cuana, ¡jashahuabaquicue Jesosaja pea epeeji cuanajo, ma acuijajja oopana ¡jiajji! Jamajjeya miya noe ¡jiajji ba majje ohuaya ¡jia pea'ai ca chana', mi jayojjaya poaje. Jamatii oya cuana quea mete ¡jashahuabaquije jama ba'a: —¡Dee! Eyaya eshahuaaja bobi ¡jianaje. Eyacuiñajji enijje quea quene poaje —jamaya ¡jashahuabaqui majje Jesosaja epeeji quea mimishi po chana'.

Jamajjeya jama acue ba'a: ¡Jesosaja pea epeeji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya ¡oya cuana jaahua-

nacue! ¹⁶ Miqúanaya jashahuabaquíani pojja'a jama ba'a: —Éyaya jamaya aña, quea ja'a nee aña.

Jesosaja epeejji quea ja'a pojjeama jashahuabaquíani mi ba majje jama poani ba'a: —Chojja, jamaya quea mimishi, quea tai —poso acani.

Jamajjeya ohua jamaya huohui canijo, ja'a oe jamaya amajaji, jamatii miqúanaya quea ja'a jashahuabaquíani! ¹⁷ Bobijo, e'ishijji pea'aijo jashahuabaquíanijo pojjeama eseya Eyacuiñajji yasijje, ojjaña huoojea'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojjoshahua Pameya eseya ba'e meesahua canijo. ¹⁸ E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjañaa mijo huohui caje jama ba'a: —Oya Jesosa Quitoja epeejji quea ja'a nee nee poani —acaje.

¹⁹ Jamajjeya jashahuaba tiitiquicue ojjaña Jesosaja epeejji cuana nijje quea bei nee eba'ejji! ¡Pea Jesosaja epeejji cuana quea ja'a po meesahuacue pea'ai! ²⁰ ¡A'a noe ijjiajji ecuiquiaja e'ijjiajji nisho onaja ba'ehuana ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ja'a ijji majajji! Jamatii Eyacuiñajjiya pana ojjaña bobi quea pame. Jamatii ma bobi miya ijjiajo onaya quea mete po mee chana', quea mimishi po o'oya mee chana'. ²¹ E'e, e'e pojja'a Jesosaja pea epeejji quea mimishi poaje miyaya ma bobi ijjiña, acuijjajja na biso nei pojja'a ishíaña ba

majje. E'e pojja'a mi ba majjeya ohuaya quea mimishi acaje o'oya. Jamajjeya ja'a jamaya amajajji! Oya quea mimishi po o'oya chana'.²² Jamajjeya ja'a Jesusaja pea epeeji cuana nijje jjamimicuiajea nobiajeaquijji bobi cuanajo, eba'e meeji cuanajo pea'ai! ¡Jashahuaba neinei qui majje quea pame nee nee acue! ¡Jesusaja epeeji cuana quea pame ameesahuacue pea'ai! Jamaya poanijo ojjaña Jesusaja epeeji quea bihui nee capoahua. Jesusaja epeeji quea mimishi po mee cani o ba majje ca ca cajjashahuabaquiahua jama ba'a: —Chojja, eya ona mimishi pomeeji poani. Jamaya eya quea tai poani.

²³ E'e pojja'a Jesusaja epeeji jashahuabaquiani jama ba'a: —E'e pojja'a jiquio bobi eya ijjaña, Eyacuiñajji enijje quea quene poaje —poani. Jamajjeya jamatii ijja cajo, Eyacuiñajji onijje quea quene poaje.

E'e, ijashahuaba neinei quicue Eyacuiñajjija esohui jayojja jama yajji! Eba'e quea mimishi miquea eba. Jamajjeya ja'a jamaya ajji! ¡E'e jojo nei quea pame nee pocue!

15

¡Jesusaja epeeji cuana quea jashahuabaqui ja'a ejjapo meeji!

¹ E'e, ecuana quea jashahuabaqui ja'a, Eyacuiñajjija esohui ba neineiaña. Beca cuana cho, quea jashahuabaqui ja'a pishana. Ona nijje ja'a quea quene pojji! ¡A'a jashahuabaquijji jama ba'a: —Eyaya ca eya ojjaña bobi ijjañe, jamatii

onaaya eya quea mimishi poani poso acani —a'a jamaya pojji!

² Chojja, ¡Jesosaja epeeji ca'a'ama nijje a'a jjamimicuiajea nobiajeaquijji bobijo! ¡Oya cuana quea bei po meesahuacue miquea ojjaña bobi ijja jjimahuajo! E'e, ¡Jesosa nijje jjapee neinei sahuameequicue! ³ Jamajjeya ¡Jesosa jama ba'ecue, miquea ejjashahuabaquijji jayojja jama pojjeama! Ohuaya oja chii jama acanaje ba'a: —Ecuea ejjashahuabaquijji jayojja jama a sa po ajja. Chojja ecue chii, eyaya miquea ejjashahuabaquijji ejo jama a sa ña.

Yahuajo nei onaaya Jesosaja esohui tehue ca poa jama ba'a:

“Ecue Chii, eya miquea ejjashahuabaquijji jayojja jama poanijo, dejja cuaa miya niñeba cani, eya pea'ai niñeba cani quea tai nee”.

Jamaya esohui yahuajo nei etehue'yo poa.

⁴ Eyacuiñajjiya ojjaña ojaya esohui yahuajo tehue mee ca poa eseya ojaya epeeji quea ja'a epo meesahuajji. Ma esohui etehue'yojo eseyaya baña onaa napa cajje ona nijje mimijaji ajja, eseya. Ma esohuijo pea'ai eseyaya baña Jesosa nijje jjapee neineiQuianijo quijje ba'e tiitiije'yo onijje eyajo.

⁵ E'e, Eyacuiñajjiya eseya ba'e meesahua cani ojaya epeeji nei. Onaa napa cajje jjapeequi pajea'yo ajja. Jamajjeya eya onijje mimiani miquianajo jama ba'a: —Ecue Chii, ¡miquea epeeji cuana Shomajo ba'e ojee jjapeequi meesahuacue; Jesosaja esohui jama ameesahuacue! —eya poani.

⁶ Jesosa nijje ojee jjapeequianijo miquianaaya ojee Eyacuiñajji bihuiaña sohuicuayanijo, esejaya Emeshi Mese nei Jesosa Quitoja Chii miquianaaya

bihuiaña jama ba'a: —Eyacuiñajji, miya ca ca oe quea pame nee, quea ca'a nee. Pea chama' mi jayojja —jamaya miquianaya poaje'yo tii tii.

¡Pea cuana nijje quea ja'a jjapeequicue!

⁷ Jamajjeya ¡Jesosa Quito hua miquianaya quea jea acani jayojja jama ojaya epeeji cuana quea jea nee acue! Jamajjeya pea cuana jama acaje ba'a: —E'e, Eyacuiñajji quea pame nee nee. Ojaya epeeji cuana onaya quea jea nee acani.

⁸ Yahuaajo nei Eyacuiñajjiya ecuanaja etiiquiana huohui ca poa jama ba'a: “Eyaya miquiana huasijje huoojeaje ojjaña jaahuanajji” poa. Jamajjeya Jesosa Quito huoojea nei canaje ojaya yahuaajo ehoojeapana poa jojoya. Jamajjeya eseya ba mee canaje Eyacuiñajjiya ohua aca poa esohui jayojjaya e'e jojo nei acani. ⁹ Oya Jesosa poeyanaje Jodio pojjeama cuana Eyacuiñajji bihuia meeya pea'ai, jama po meeya pea'ai ba'a:

“Eyacuiñajji, miya quea pame nee nee, quea ca'a nee nee. Ecuanaja mimishi cuanaajo jjashahuaba tiitiqui ajja. Cuijea'yo majje quea bei ecuanaja nijje poani”.

Yahuaajo nei Eyacuiñajjiya Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje. Sohuicuaya majje miya bihuiaje”.

Jamaya yahuaajo nei nei poa. ¹⁰ Yahuaajo nei tehue mee ca poa jama pea'ai ba'a:

“Jodio pojjeama cuana, ¡Jodio cuana nijjeya Eyacuiñajji bihuiaje! ¡Quea bihui nee nee pocue!”

¹¹ Jamaya tehue mee ca poa pea'ai ba'a:

“Jodio pojjeama cuana, ¡Eyacuiñajji bihuiacue!
E'e, ¡ojjaña cuaa Eyacuiñajji bihuiacue, so-
huicuayacue jama ba'a: —Eyacuiñajji, miya
quea pame nee —jamaya acue!”

Jamaya aca poa. ¹² Eyacuiñajjiya Isaia tehue mee
ca poa jama ba'a:

“Quijje nei nei Isaija osecua cuayaje. Oya ona
huoojea'yojji poaje'yo. Ohuaya Jodio po-
jjeama pea'ai mimishi cuijea'yo majje ba
mee caje'yo, onijje ba'e tiiti mee caje'yo”.

E'e, jamaya yahuajo nei Isaia tehue mee ca poa
Jesosajo. ¹³ Jamajjeya Eyacuiñajjiya eseya ba
meesahua cani jama ba'a: Quijje ohuaya eseya
ba'e tiiti mee caje'yo eyajo onijje. Eya Eyacuiñajji
nijje mimi majamajani miquianajo jama ba'a: —
Eyacuiñajji, ¡miquea epeeji cuana Shomajo ba'e
quea bihui nee po meecue! ¡Minijje jjapeequianijo
quea ja'a nee jjashahuabaqui meesahuacue! —
eyaya aña.

Edojjoshahua Pame miquiana nijje nequi. Oya
quea ca'a nee nee. Miya ba meesahua cani
miquiana quijje Eyacuiñajji nijje ba'e tiitiije'yo
eyajo.

*Pabohua Shomano cuana Jodio pojjeama cuana
baqui sa acani*

¹⁴ E'e ecuea epeeji cuana, eya ca ca iña
miquianajo jjashahuabaquiani jama ba'a:
Miquianaya Jesosaja epeeji quea pame
nee. Miquianajaya eba nei nei Eyacuiñajjiya
esohui e'e nei Jesosajo. Ma esohui huohui
huicha'a huicha'aña. Pea cuana quea ja'a nee

jjapeequi meesahuaña Jesosa nijje, miquianaaya.

¹⁵ Jamatii Eyacuiñajjiya eya huohui canaje jayojja jama eyaya miquiana huasijje oja sohui tehuenaje. Beca ejjashahuabaquijji quea ja'a nee nee tehuenaje mi jjabahuejjaqui meejji, miquianajaya epajea'yojji pojjeama.

¹⁶ E'e, Eyacuiñajjiya eya huoojea canaje Jodio pojjeama huasijje ojaya esohui huohuiya, Jesusajo ehuhuijji. Jiquio ecua yahuajo nei Eyacuiñajji nijje emimijji Jodio huasijje Eyacuiñajjiya esohui aca poa jayojja jama eyaya ojaya esohui Jesusajo cahuohuahua miquiana que, Jodio pojjeama huasijje Jesosa nijje ejjapeequi meesahuajji. Jesosa nijje jjapeequianijo, Eyacuiñajji miquiana nijje quea bihui nee poani, Edojjoshahua Pameya pea jjashahuabaquime po mee ca'yanijo.

¹⁷ Jamajjeya eya quea bihui nee poani. Jesosa Quitohua eya Jodio pojjeama cuana huasijje Eyacuiñajjiya esohui huohui meesahua cajje ojaya epeeji cuana poanaje. ¹⁸ Jiquio ca ca oe eyaya miquianaya quea bihui huohuiaña jama ba'a: Jesosa Quitohua Jodio pojjeama quea pame ba'e meesahua cani Eyacuiñajjiya esohui jama ojaya epeeji nei epojji. Ohuaya jamaya acanaje eya ojaya esohui huohuijji poanijojo. E'e, Jesusaa eya ameesahua canaje, huohui meesahua canaje pea'ai jama ba'a: ¹⁹ Eya Edojjoshahua Pameya ma dejjaa ajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pea'ai, johuaam Ininico huasijje pea'ai eyaya ojjaña Eyacuiñajjiya esohui quea pame nee Jesusajo huohui neinei poquia poa. ²⁰ Jamaya eyaya esohui huohui

sa aña pea cuana huasijje, onaja sohuihuohuiqui jjima huasijje. E'e, jiquio esohui quea pame Jesosajo shajja'ajja jjima cuana huasijje eyaya ma esohui huohui sa aña. ²¹ E'e, yahuajo nei Eyacuiñajjija esohui etehue'yo jama aca poa ba'a:

“Ojjañaja yahuajo shajja'ajja jjimaa Eyacuiñajjija huoojea'yo ojjaña jaahuanajjijo shajja'ajja caje. Ojjaña joya o ba pojJimaa oya ba caje”.

E'e, jamaya eyaya a sa aña, Eyacuiñajjija esohui etehue'yo yahuajo jama.

Pabo Shoma huasijje poqui sa poani Jesusaja epeeji cuana baa

²² Yahuajo eya quea huiso poqui sa poa Shoma huasijje miquiana baa. Jjeya pea'ai eya poqui sa poani. Quea huiso pea cuana huasijje esohui huohui poequi jjejojo mi poquinaje. ²³ Jjeya ca ca eya apoa. Ojjaña cuiñajji yasijje jiquiojo esohui huohuijeyonaje. Jamajjeya ma ecua eya yahuajo jjashahuabaquinaje jamaya eyaya jjeyahua nei aje. ²⁴ Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miquianaya bananaje. Shomajo anije beca cahuime pojja'a. Quea bihui nee nee eya poaje miquiana nijje nequinana majje. Miquiana nijje mimi majje eya poquije España meshi yasijje. E'e pojja'a miquianaaya eya aquiana quiaje epoqui meesahuajji pojja'a. ²⁵ Miquiana huasijje poqui jjimahua eya poquije so'o Jenosanena huasijje Jesusaja epeeji aema huasijje ejjesheji quiaa, Jodio cuana huasijje. ²⁶ Ma ejjesheji Jesusaja epeeji cuana

Masenonia meshijo ba'eya, Asia meshijo ba'eya pea'aiya chicha canaje Jesusaja epeeji aema' ba'e meesahuajji. Jamaya oya cuana a sa poanaje. Oya Jodio pojjeama poani. ²⁷ Jamatii quea bihui nee quia canaje. E'e, ohuaya ejjeshejji caquia cahua Jesusaja epeeji Jodio cuana ba'e meesahuajji. E'e, Eyacuiñajjiya Jodio cuana iyaa coo ca poa ojaya epeeji epojji. Majoya Jodio cuaa Eyacuiñajjiya esohui quea pame nee Jesusajo Jodio pojjeama cuana huohui cajje Jesosa nijje jjapeequinaje. Jamajjeya Jodio pojjeama cuaa Jodio cuana huasijje eba'e meeji cahuoojea cahua, Jesusaja epeeji cuaa. ²⁸ Jamajjeya Jenosanena huasijje poqui majje, ma ejjeshejji quia majje eya poquije España meshi yasijje. Poquijeya eyaya miqianaya bananaje. ²⁹ Miqianaya banana majje quea bihui nee nee poaje. Ojee jjapeequianijo, Jesusaja esohuijo eseya quea bihui nee poaje'yo.

³⁰ Epeeji cuana, esejaya Emeshi Mese nei Jesosa nijje jjapeequianijo, Edojjoshahua Pameya eya miqianajaya quea jea ameesahua canijo, ¡Eyacuiñajji nijje mimicue ejo! ¡Jama acue ba'a: — Eyacuiñajji, Pabo miquea esohui huohui canijo quea camaja nee nee. ¡Oya jaahuana neineicue! ³¹ Jamajjeya ¡Jesusaja epeeji pojjeama cuaa Jenosanenajo ba'eya oya enapajji pojjeama! ¡Miquea epeeji jomajo ba'e quea bihui nee ejjeshejji jjeshe meesahuacue ma Pabohua ye cani! —jama oe miqianaaya acue Eyacuiñajji nijje mimi majje!

³² E'e pojja'a Eyacuiñajjiya eya miqiana que huoojea caje. Ohuaya eseya quea bihui nee jjapeequi meesahua caje quea pame nee.

³³ Eyacuiñajjiya eseya quea bei ba'e meesahua cani. ¡Ohuaya miquianaya cajaahuana cahua! ¡Jamaya capoahua!

16

Pabohua Jesusaja epeeji cuana huasijje tehue canaje quea bihui o pojji

¹ Ecuanaja epeeji epona Peme bajjani Jesosa nijje chacochoani Senesea cuiñajjiyo. Oya Jesusaja epeeji quea pame nee. Jesusaja pea epeeji cuana jaahuana cani. ² Miquiana que poquiyajo, ¡oya huohuicue jama ba'a: —Mi poeyajo ecua quea bihui nee —acue!

Ohuaya eya ba'e meesahua cani, pea Jesusaja epeeji cuana pea'ai ba'e meesahua cani quea huiso nee. Jamajjeya miquianaya Jesusaja epeeji poani pea'aijo ¡oya ja'ajjequicue! ¡Oya aquiana quiacue eba'ejji! ³ Pisina pea'ai, oja yahue Aquiana pea'ai miquiana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijje chacochoconaje. Jesusaja esohui huohui sahua canaje. ⁴ E'e, eyaya Jesusaja esohui huohuiañajo, pea cuaa cuia'ajja canaje. Pisina, Aquina pea'ai ca ca e nahuejo beshahua nei cuia canaje cuaa. Jamajjeya eyaya, Pabohua Jesusaja epeeji Jodio pojjeama cuana nijjeya oya huohuiaña jama ba'a: —E'e, jamaya miquianaya quea pame nee nee poanaje —ecuaaya anaje.

⁵ Ojjaña Jesusaja epeeji cuana ma Pisinaja equijo jjachichaquiani eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pea'ai ecuea epeeji Epeneto bajjani. Asia meshijo ba'ya poa oya. Ecuea esohui Jesusajo shajja'ajja majje oya ebionei Jesusaja epeeji poanaje jomajo Asia meshijo ba'yahua. ⁶ Mania pea'ai quea huiso chacoconaje miqiana niije. ¡Oya ecuea esohui huohucue quea bihui nee o pojji! ⁷ ¡Oya jayojjaya mimicue Anidónico niije, Jonia pea'ai niije! Oya Jodio cuana, ecuea huapa pojjeama cuana. Oya eniije ejeanobia jaanaje. Jesusaja epeeji quea pame nee oya poa, Jesusaja huoojea'yo esohui huohuiji. E Jesosa niije jjapeequi jjimahuaajo oya cuana jjapeequia poa. ⁸ ¡Oya jayojjaya mimicue Amepia niije pea'ai! Oya Emeshi Mese nei Jesusaja epeeji nei. Jamajjeya: —¿Achajja ami ani so'o, ecuea epeeji? —acue oya, ecuea ebajji.

⁹ ¡Oya jayojja mimicue Omano niije, ma ecuana niije Jesosa Quito niije chacoconaje! ¡Etaqui pea'ai, ¹⁰ Apene pea'ai jama acue! Oya Emeshi Mese nei niije chacoconanijo quea nee poanaje quea huiso. Ecuana eba oya Jesusaja epeeji quea ca'a nee. ¡Ojjaña Anisitomoja huapa pojjeama cuana ecuea esohui huohucue pea'ai quea bihui nee o pojji! ¹¹ ¡Jodio dejja Jenonio bajjani jama acue! Oya huapa pojjeama pea'ai poani. ¡Oya Nasiso, Nasisoja huapa pojjeama ecuea esohui huohucue pea'ai, Jesosa niije jjapeequianijo! ¹² ¡Tipena, Tiposa oya jayojjaya huohucue! Ma epona cuana Emeshi Mese neijo, Jesusajo quea huiso chacoconaje. Epona Pesina bajjani pea'ai Emeshi Mese neijo janobajjima nei chacoconaje. ¡Oya pea'ai ecuea esohui huohucue,

ecuea epeeji nei oya! ¹³ ¡Jamaya mimicue Shopo n-
jje, ojaya enaese nijje pea'ai! Ojjaña eba Jesusaa,
Emeshi Mese neiya Shopo babaca canaje ojaya
esohui huohuiji. Ojaya enaeseya eya jaahuana
canaje ecuea enaeseya jayojjaya. ¹⁴ Jamajjeya oya
jayojjaya huohucue ejo Jesusaja pea epeeji cuana
nijje pea'ai, ma bajjani cuana nijje ba'a: Asin-
isito, Peconete, Jemesi, Patomasi, Jemase pea'ai.
¡Ojjaña Jesusaja epeeji onijje nequica pea'ai ja-
maya acue! ¹⁵ ¡Ecuea esohui quea bihui nee o pojji
huohucue Pinonoco, Joña, Neneo, oja jjo'i pea'ai,
Onipa pea'ai ojjaña Jesusaja epeeji cuana onijje
nequica pea'ai huohucue!

¹⁶ E'e, miquianaya jjachichaqui majje ¡pea
cuana nijje quea bihui nee mimicue jama ba'a:
—¿Achajja ami ani so'lo, epeeji? —acue!

E'e, ojjaña Jesusaja epeeji cuaa jiquiojo enijje
nequiya miquianaya Shomajo ba'e quea bihui nee
acani jama ba'a: —¿Achajja acuae quiana ani so'lo?
—acani ojaya ebajji.

Mahuiso.

*Pabohua pea esohui quea ja'a nee eba'e meejji
huohui cani*

¹⁷ Ecuea epeeji cuana, eyaya miquiana cuana
pea esohui tehueña jama ba'a: Beca cuaa
miquiana nijje nequiya Jesusaja epeeji cuana
pea epeeji cuana nijje jjamimicuijaja nobiajaja
meequi cani. Pea esohui e'e nei pojjeama Jesosa
Quitojo huohui cani pea'ai, ecuanaja esohui
jayojja jama pojjeama. Ecuaaya ca ca e'e nei
esohui huohuiaña. ¡A'a oya cuana shajja'ajjajji!
¡A'a jja oe onijje jjapeequijji! ¹⁸ Ma siajjepojji
cuana esejaya Emeshi Mese nejjo Jesusajo chaco

ajja. Chojja. Oya cuana esohui huohuijji nisho. Ojaya ejjashahuabaquijji quea quehua jayojja jama acani. Mimiani esohui quea pame jayojja. Jamatii quea tai. Siajje poani. Jama poani ba'a: — E'e, eya miqúanajaya epeejji; miqúanaya quea pame nee nee ecuea epeejji — anisho caní. Jamaya Jesosaja epeejji quea jjashahuabaqui ja'a pishana dasia caní.

¹⁹ Ojjaña Jesosaja epeejji cuaa shajja'ajja canaje miqúanaya Shomajo ba'e Eyacuiñajjija esohui jayojjaya ba'yani. Jamajjeya eya miqúanajo quea bihui nee. ¡Quea ja'a nee jjashahuabaquicue quea pame nee eba'ejji! ¡Ma esohui huohuijji nishoja esohui e'e nei pojjeama a'a shajja'ajjaji! ¡A'a jamaya pojji! ²⁰ E'e, Eyacuiñajjiya eseya quea bei ba'e meesahua caní, quea ja'a jjashahuabaqui meesahua caní jjeya nei. Ohuaya miqúanaya Edosiquianaja epeejji mimicuiajejanobiajea meesahua caje'yo. Miqúanaya ojaya edasia'yojji pojjeama. E'e, ¡Jesosa Quitohua esejaya Emeshi Mese neiya miqúanaya cajaanuana cahua!

²¹ Timoteo enijje chacochoani Jesosa Quito nijje. Ohuaya pea'ai miqúanaya jama huohui'ajjame acani ba'a: —¿Achajja acuae quiana so'o? —acani.

Ecuea huapa pojjeama Jodio dejja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

²²⁻²⁴ Cayo pea'ai oya jayojjaya miqúanaya nijje mimiani. Eya oja equijo ba'e. Ojaya equijo Jesosaja epeejji cuana ojee jjachichaquiani Eyacuiñajjija esohui baa. Enasitohua, pea epeejji

Cuanito bajjaniya pea'aiya huohui'ajja mee cani jama ba'a: —Epeejji cuana, ¿achajja acuae quiana ani so'o? —acani. Oya Enasito ejjeshejji cuiñajji poani, ma Conitio dejja etiiya chicha mee cani ejjeshejji.

Eya ca iña Jesusaja epeejji Tesio bajjani. Eyaya Paboja esohui miqiuana que tehueaña ojo. Eyaya miqiuana ya huohuiaña jama ba'a: —Miqiuana ya Jesosa Quitoja epeejji, esejaya Emeshi Mese neija epeejji poanijo, ohuaya miqiuana ya quea pame nee cajaanuana cahua. E'e, jamaya capoahua — jamaya Pabohua eya tehue mee cani.

Eyacuiñajji bihuia cani Pabohua

²⁵ Eyacuiñajji ejjabihuaqui jama ba'a: — Eyacuiñajji, miya quea pame nee, quea ca'a nee nee. Miquea esohui jayojja jama ba'e meeaña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yojji poani ojjañaja. Maya yahuajo ecuanaja etiiquianaja ba jjima poa. ²⁶ Jodio esohui huohuijji yahuajo nei ba'ya poaa Jesusajo huohui ca poa quea ja'a pishana, ojaya ba jjima pishanajo. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiiani. Miya ca ca oeya ojjaña cuana ojjaña meshijo ba'e ba meesahuaña esohui e'e nei Jesusaja. Ma esohui quea pame jayojja jama ameesahuaña pea'ai. Jamaya ojjañaja eba poaje.

²⁷ —E'e Eyacuiñajji, miya oe nei Eyacuiñajji, pea chama'. Ojjaña ca ca oe miquea eba, miquea nei.

Ecuana Jesusaja epeeji poanijo ecuanajaya eba miya quea pame nee nee, quea ca'a nee poani tii tii. Jamaya capoahua —jamaya ejjabihuaqui Eyacuiñajji.

Eya Pabo bajjani. Mahuiso ecuea esohui miqiana Shoma cuiñajjijo ba'e yasijje tehue meeña. Apoa.

Eyacuiñajjija Esohui
New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files
dated 29 Jan 2022

88838088-e20d-51ca-8c91-69194f5ae678